

皇明經世文編

序

文章莫尚乎經濟矣

明興

高皇帝提三尺劔攬羣策

以定天下

聖子神孫翼翼繩繩三

百年來名臣輩出如

嶽如河如鸞如龍所

以謀謨於總章之上
諷議於簡策之下者
固已麟炳往古灼乎
來茲矣亦各挺世而

彰際時而建故贊君

德則商霖周袞之功

弼盛猷則調燭陳符

之事語財賦則管商

桑孔不足言其能論
掌故則鄭玄王肅不
足侈其學山川險易
則裴楷賈耽之曉練

天文星律則洛下一
行之精明邊備則營
平代國不能勝其訐
謨河漕則王景韋堅

無以驕其治辨此其
人皆奮迹本朝不求
異代而又世有明哲
之后時逢不諱之朝

故直言極諫不絕於
公車草野瞽謀常叅
其末議學士家不知
近事往往是往古而

非當今然而傳曰法
後王則以

昭代之人文經

昭代之國事豈有不足

者耶今

皇帝勤思大業宵旦未遑

仰

二祖之風猷闡

列宗之光烈將以對揚厥
美旁求俊乂而

先朝股肱胥輔之臣折
衝禦侮之士或有欽

其績而不覩其文覩
其文而不識其用者
則後起之徒毋乃闇
汶惑昧不克當於

天子之意主日聖而臣日
愚卿大夫之辱也貢
待罪守郡十有一年
政拙心長勞輕過重

猶幸此鄉多文雅之

彥若徐文學孚遠陳

進士子龍宋孝廉徵

璧皆負韜世之才懷

救時之術相與網羅
往哲搜抉巨文取其
關於軍國濟於時用
者上自洪武迄于今

皇帝改元輯爲經世一編
文從其人人從其代
覽其規畫足以益才
智聽其敷奏足以壯

忠懷考其始終足以
識時變非徒侈一代
之鴻章亦將以爲

明時之獻納云爾

襄西方岳貢禹修父

題

序

雲間陳臥子全徐闇公宋
尚木所集經世編成郡守
以其書示余余讀而歎曰
猗與旨哉我

國家治安三百年

列聖之所疇咨諸臣之所竭

思大約可見于茲矣夫士
大夫之學術知今而不知
古其蔽也凡陋知古而不

知今其蔽也迂疎必欲兼
之則知古易而知今難者
前代之事業有成史諸儒
之所論列類聚羣分各有
典要學者加歲月之功固

已舉其流畧矣至于

本朝之所以麟炳往古焯乎

來茲者雖典制多陳而謨
謀未著金匱石室之所藏
旣不能無掛漏于上文苑

家乘之所緝又不能無散
軼于下則雖深心掌故之
家窮年搜討未究萬一今
三君俱以通達淹茂之才
懷濟世安邦之畧採遺文

于二百七十年之間襄盛
事于數月之內而郡守
又能于政事之暇兼統條
貫以揚厲厥事故功相得
而速成後之君子其欲覽

觀于斯者豈非有不勞之
獲哉嗟乎是數十百人者
皆國家之名公鉅卿得
志于時者之所爲也不然
則其時之不及爲而徒其

言之存也不然則其人之
不足錄而其言之不可廢
者也 本朝

二祖以來賢聖繼作山嶽降
靈英人傑士比有相望昌

言偉論不絕于時然求其
說行于君而功見于世如
三楊之於

宣宗于忠肅之於

景帝李文達之於

英宗劉忠宣之於

孝宗永嘉之於

世宗江陵之於

神宗寥寥寡儔不可槩見故
得君行道古人以爲難而

其他議出而爭起策行而
謗生者不可勝計及其事
定之日則是非得失朗然
皆見數傳之後猶可獲其
言之利焉愚嘗觀西漢之

隆宣帝練羣臣核名實而
丞相高平侯數上封事皆
稱上旨然其所以爲能者
不過好觀漢故事及便宜
章奏如賢臣賈誼鼂錯董

仲舒所言奏請施行之而
已今

皇帝神聖非漢宣中庸之主
能較其萬一而十四朝之
鴻文偉畧有不止于賈董

諸人者假使公卿之中有
一人爲高平侯則夷狄安
足禦而盜賊安足平哉余
待罪江南未閑軍旅然於
異度之士廉勤之長未嘗

不盡心焉旣嘉三君有當
世之志而又多太守能
博盡英才之意以布之天
下而即以上諸賢異日之
所樹也於是乎言

東陽張國維題

讀雲間諸名公

皇明經世編有言

方今

聖明

天縱丙夜觀書支日通章

其於天下古今之故可

知矣一切尋嘗獻替如

奏十日鈞天又聞蟋蟀

之鳴其誰能聽之矣古
人謂明主可以理奪大
要在聞所未聞夫事

堯舜之主而欲令聞所未

聞吾見其難矣唐文皇
每與群臣言其臣皆恍
惚墨食如試子鎖棘聽
有司執策正不知出何

典籍也惟魏徵展盡底
蘊時見更端起予此非
徵之才具獨優蓋見文
皇之好學而黽勉從事

者也况乎事

堯舜之主而不思所以黽

勉于効忠之路也夫欲

黽勉于効忠之路如卧

子所輯經世編其不可
不讀也魏相非條上本
朝故事而欲以傾筐倒
篋以事綜核之漢宣吾

知其淺瑕不難見也忠
孝之性雖不可以假人
然而聞見空踈徒知自
勉不可強也豆目不足

以研變覓勝不足以貯
理于是乎略不能以措
治道不可以格若敷奏
則隔靴誥責則透裘此

非不才不忠之過而不
學之過也故卧子之經
世編所以廣為臣者効
忠之路也非

神聖之主其臣莫及必不
能令群下自知不足而
盡相勉于好學而非有
識大之賢者亦不能奮

訐謨于繁蕪而要其歸
于明良之揆令二百七
十年之偉人呼其名于
徑上儼然廷立而議為

願忠者謀斷之先資而
取法取裁皆于是乎有
當也是則卧子之力也

夫

北海任濟書

序

明興二百七十有餘載遐靈四暢
元氣周匝才激風烈所在瀾
淪蓋文治之隆於斯極矣而
規模宏闊綱密目繁始未嘗

不詳明整肅而後凌遲也木
蠹蟲生薪炎鼎沸識者於是
致歎

祖宗朝允文允武之實政廢爲簿
書期會之虛文意寓風刺抑

重有憂矣矧今日而憂特甚
南寇北奴日益滋大乃文人
柔弱旣已論卑氣塌無當

上旨凡而咕哦誦記自章句而外
無聞焉毋論天文斗宿地脉

龍蛇通靈遐光元聲大律之
書未曾夢見卽昭彰如漕馬
鹽茶按部如九邊圖塞星列
碁布如坵塿圖甲揭鼓如屯
鑄爛陳如孫吳諸葛兵法持

一往叩東支西吾如拾敗芟
於零霜丐殘羹於覆鼎縱有
所得皆出棄餘又矧嗜欲營
營本原淆混生殷憂逼仄之
時希倖於優游福勝之事懷

此道也以往卽奈何欲佐

聖主成唐虞三代之治乎同盟徐

闇公陳臥子宋尙木三君子

慨然念之收拾

昭代爰集群文彙成一書顏曰

經世觀其昭統品題宏敷理
體疏義鋪張琅琅法物誠哉
一代之鴻章千秋之盛業也
原夫三君子之用心蓋不勝
邛隆之樂江河之感焉當

二祖開天文息萌蘖意主剗革胡
元驅除內宄從龍靖難諸賢
大功既成無煩議論迨夫

景陵恢彌天之羅

裕陵啓綢繆之纍

茂泰以還迄今

康廟家謀戶斷蓋已方軌周模備

存殷鑒

永陵在位四十餘年會當煩興雲

龍輻輳天蓋多畱賢才以啓

隆慶之治而我

皇祖適逢其盛四十年以前父老

欣欣願望太平揆厥原本良

由

聖主從容以論息哲臣誠明而抒

讜或振臂伸眉於盤錯之中
或慘澹經營於寤言之頃或
舍己而攬衆多之謀或違僉
而行獨斷之智或度事如神
赴若影響或遲應若鈍屹如

山嶽披綜排宕颯颯向人恨
不同時乃爾餽歎是猶溯泉
而逢伊洛觸目而見琳瑯三
君子之爲此也蓋其樂也若
迺微茫之數兆乎陰陽治亂

之間間不容髮石畫奪造化
之功祕謀犯鬼神之忌則亦
有策勒金碑身膏銅釜

裕陵之復辟

康陵之阻轍

永陵之議禮英風偉論旣如此艱
難義命又如彼抑或韜略蘊
神多難良事入微於身前言
徵於定後低畱憫惻而莫可
誰何者未易勝數抑或所言

平平聞見忽置浸淫潰壞輒
追曩謨坐此之類亦云多矣
是故言之未必卽行及其行
之而已不可復智昧相乘循
環無已此

聖帝謀臣所以撫膺長歎於失時
也豈非魏徵之所反覆而爭
陸贄之所危坐而議者歟三
君子之爲此也是則其感矣
感之維何

國朝良法美意未變於管士大
夫矜文學之彥修儒雅之容
十室獨有顧激風搖之動見
露肘致煩

天子咨嗟改容欲誄文右武有君

無臣辱在科目

聖人之憂士大夫之恥也洪惟

二祖

列宗先後輝映經濟之材不借異
代以余約略近輓在

英宗則以王于兩忠肅爲倡周文
襄耿清惠爲輔在

憲宗則以王端毅項襄毅爲傑李
襄敏陳康懿爲輔在

孝宗則以馬端肅劉忠宣爲冠倪

文毅一人爲輔在

武宗則以王文成李康惠爲首胡

端敏爲輔在

世宗則以張永嘉爲最徐文貞爲

輔是皆具命世之才經世之

識持世之學故其勳名爛然
文章踔約於今爲烈功等開
躬他如周襄敏以片言而釋
諸將疑阻黃文簡之策阿魯
台一言洞徹如立高岡李文

正之辨倉糧談言微中遂免
輸邊之煩又其尤者倪文毅
邊事狀略魄動指寒今猶在
星辰河嶽間其論邊漕也毋
憚一時之勞而失久遠之利

李康惠之築堡屯田劉忠宣
之兵政弊端十事言重詞複
中有大美存焉若是者全篇
固資徽謨隻語亦存綱略稱
此以求揄美闡幽雖層必錄

片羽碎金偶見亦鮮本

聖門不以人廢之條奉

明王言者無罪之例茲義所存梗

槩備焉矣或有難者曰大禹

疏河未聞旁搜水經咎由明

刑豈必曾讀律令若之爲是
業也糟者猶糟粕者猶粕恐
刻舟再譏於昭明膠柱徒姍
於鼓瑟曰是不然絕智奇才
不常有而中才常有患坐不

讀書耳譬彼賤工妄施琢削
必患血指守高曾之規矩寸
量尺度雖無五鳳樓之觀而
一架一椽聊備結構故曰前
事之不忘後事之師三君子

者豈不知

聖明在上必有殊尤曠絕之佐厝

國事於盤石運前籌於掌握
是編蓋爲中才說法而要之
二伯餘年典章煌煌昭揭卽

絕智奇才豈有舍筏而登寶
山羃炬而洞雞鼎者張芝評
事曰一識所效有限而見聽
所及者廣柳河東亦言具方
剛之力不得馳驅疆場佐戎

行致死命欲報國恩惟有文章然則二三君子之從事於斯也其志意亦已較然明白於天下矣

客越盟社第黃澍拜識

序

余每開卷恨今人不如古人
然居今之世爲今之人慕說
讀書上視古人其難倍之三
代以來著書寢廣秦火蕩滅

所存頗微漢儒興學論說日
繁窮年皓首後世莫及然業
有專家學者通一即享高名
降而今日聚書如林談兩京
則遺魏晉言六朝則闕唐宋

此詳彼畧仰屋竟夜其難一
也前代文字爾雅可觀得其
一篇諷詠不倦世代漸移語
言俚雜卷充棟宇披排欲曠
其難二也有志之士敝蹤章

句放意典墳非不自命豪傑
然逡巡兩難之間垂老而無
一成者多矣余間語同志讀
書大事當分經史古今爲四
部讀經者輯儒家讀史者辨

世代讀古者通典實讀今者
專本朝就性所近分部而治
合數人之力治其一部不出
二十年其學必成同志聞者
咸是余說而雲間徐闇公陳

臥子宋尚木尤樂爲之天才
英絕閉關討論直欲以一人
兼四部不難也客年與余盱
衡當代思就國史余謂賢者
識大宜先經濟三君子唯唯

遂大搜羣集采擇典要名經
世文編卷凡五百偉哉是書
明興以來未有也右文之朝人
尚史學綜覽

昭代著作多塗鄭鄧體倣史記

焦雷傳記人物典章摺於勞
徐治法述於吳鄧書雖通行
義例未顯王弇州朱烏程鄭
上饒李湘陰饒進賢周梁谿
各有論譔雅稱史裁然或功

半而人亡或身沒而言隱孰
有分別政事明白讜言如文
編者哉三子志存治世詞不
苟榮進善退惡一票春秋文
編所載網羅稍寬有補兵食

中禮樂者殷勤收錄不忍遐
遺使

明主見而拊髀執事聞而交儆
用其言而顯其人棄其人而
存其言賞罰自在也其思深

其文遠矣

成祖建極大典始脩

英宗紹業統志克撰

列聖相承如會典集禮諸書累

有勅纂煌煌乎

高祖之志也

聖人在上制作方盛設以三子
典職其間筆削良史必能夙
越前代豈特雲臺高議東觀
頌德而已哉宋時司馬文正

既作資治通鑑復與劉道原
議取其時實錄正史旁采異
聞續爲後紀後以召相不果
至今宋無佳鑑海內痛惜今
三子悠游林麓天假以時載

筆之始又先以 國家爲端
他日繼涑水者其在雲間乎

社弟張溥題

序

經世編者吾郡諸子志在
用世參訂往詰備一代經
濟之書也書成眎予予不
合時宜爲世所棄亦奚當

於用世而盲是問雖然予
惟學士大夫半生窮經一
旦逢年名利嬰情入則問
舍求田出則養交持祿其
於經濟一途蔑如也

國家卒有緩急安所恃哉古
今人不甚相遠古人經生
時即以天下爲已任何至
今動稱乏才也今

天子明聖急求忠良共圖治

平而人材自逆豎摧折之
後正氣甫伸邪氛未淨小
人當國災害並至於是奴
寇交訐兵餉兩誦致煩

至尊宵旰而士大夫俛仰自

若轉展推避急則首鼠兩
端緩則泄沓一意於是

天子乃心厭薄之下

明詔使得各舉所知破格拔
用之甚者樽俎折衝封疆

禦侮徃徃思借才於草土
幽憂之中冀收萬一或然
之效雖言者以綱常大義
動色爭之而不可得豈

聖衷所繇得已哉亦士大夫

經濟濶疎積漸使然耳今
海內文章氣誼之盛恒首
推吾吳而亦以此叢異已
者之射的若諸子尚論
昭代取經世大畧表而出之

勒成斯編爰自

二祖開天豪傑挺生

列宗繼統名世輩出近如

世廟聰明獨斷蚤擅中興之

名

神祖端拱若神卒成久道之
化其間立德立言立功士
大夫彬彬經濟之效犁然
可攷蓋於文章之外孜孜
討論更進一籌其志甚銳

彼異已者即能妬其文能
并奪其志否乎予被放以
來杜門寡交臥子闇公尚
木獨時相過從臥子讀書
養氣其勁骨熱腸亟當爲

世用尚木與閻公諸子竝
以曠世才閉戶著述究心
千秋之業予嘗覽斯編一
代兵農禮樂刑政之大端
賅是矣而於忠佞是非之

際尤凜凜致辨焉以故言
以人傳者重其人亟錄其
文言不以人廢者存其文
必斥其人諸子涇渭在胸
邪正在目其用意深而取

裁當故足多也以予所知
閩中黃石齋先生負重名
頃抗疏歸來直聲震天下
而不能不心賞斯編聞已
爲之玄晏矣予更何庸贅

一詞予惟以諸子之志如
此他日出而以天下爲已
任必可以副

聖天子求賢圖治之至意洗
士大夫經濟闊疎之舊恥

則斯編固其嚆矢焉爾

同郡許譽卿題於南村

草堂之遯閣

序

有經世之才必濟以經世之
學有經世之識始抒爲經世
之文才與學與識兼備而人
重焉雖無文可也才與學與

識兼備而文行焉雖欲無文
而亦不可得也人之才必不
能過乎天地而決不能以學
與識讓之天地天地之文亦
不能過乎人而嘗以學與識

懸恨乎人三代以上六經以
前夫人而皆才人也則夫人
而皆文人也才之所以壞則
利祿之塗壞之學與識之所
以昏則利祿之熒昏之吾聞

諸班固自武帝立五經博士
開弟子員設科射策勸以官
祿訖於元始百有餘年傳業
寢盛枝葉繁滋經說至百餘
萬言大師衆至千人蓋利祿

之路然也不特此也利祿之
路旣繇科目科目之設必以
文辭故三百篇之詩盡在聲
歌自置詩博士不聞有一篇
之詩六十四卦之易該於象

數自置易博士不見有一卦
之易皇頡制字盡繇六書漢
立小學凡文字之家不明一
字之宗伶倫制律盡本七音
江左重聲韻凡音律之家不

達一音之旨何況後世設立
巍科苟且俳耦所端一經反
不能上口經壞而所以經世
之術皆壞即在文字之中語
言之內荒唐紕繆爲弊已極

又安望其扶陰陽挽否泰審
治亂之數拯迷復之凶經綸
於屯始而幹旋於蠱終取天
地已釋之擔而肩之荷之乎

高皇帝百戰以洗羶腥當草昧

之初制科之始即曰我取士
欲得經明行脩博古通今文
質得中名實相稱者而後用
之旁求所孚鼓桴交應文武
之業鬱然並興其後

列聖薰陶冶化濃郁貞臣亮士

挾節建勲咸本之以躬行汲
之以脩古先之以膽識殫之
以斐誠萋萃盈林球刀入序
披英揆藻炳虎雕龍乃浣其

質而睨之猶然白賁也至今
日而齊紫敗素什倍賈之蓋
一涉利祿猶之入紫然三入
而纁五入而緹七入而緇迄
九入而始得紫不知適以奪

朱而滑素則亦安用此燁燁
眩目者爲於是羔羊告替鵝
梁漫盈豹霧空饑鳳阿罷響
吾郡二三憂天恤緯之士起
而盱之爲之述盛軌發隆躅

懼鼎實之弗調則誠陳水火
慮棟橈之或折則資集拱榱
守邊果賴於當罷飾法要先
於束矢譬颺姚乘則以禮爲
樂基披姒圖則假貢爲征始

鑒二代則悟兵爲刑端采薇
天保有外內之分江漢黍苗
有小大之別而總期於按劑
切脉探穴下砭即熙明之協
唱爲板蕩之于喁本豐美之

形儀壯瘠弱之神氣諸君子
之用心苦而用力亦滋勤矣
陳臥子徐闇公宋尚木才俱
通敏而學識淵宏其測指遠
其取義章其出謀揆慮達國

體之宜而汲汲爲救時之用
即所纂述率取胸中成竹而
自抒寫之豈其持土鼓執塗
羨古方今病之不相當乎試
閱五百卷中條例森嚴義類

精鑿蹟而不厭博而有要亦
在覽者深思而自得之耳管
宋景文嘗自言手抄文選三
過方見佳處洪景盧亦嘗手
抄資治通鑑三過始究其得

失溫公亦曰吾作通鑑惟王
勝之嘗閱終篇自餘君子求
乞欲觀讀未終一帙已欠伸
思睡矣吾願世之有志經世
者歛其才識而一用之於學

豈惟多識畜德爲世鉅儒雖
以阿衡管葛自處可也何利
祿之足云

同郡馮明玠題

序

蓋天下有文章淹雅之家有
經術幹理之家二者其致不
同當其執卷操筆所趣各殊
矣余嘗聞諸長者云新都楊

文忠公江陵張文忠公自釋
褐以後即棄去向所業文詞
盡取

國朝典故誦之手指心憶得
其條理及其當國沛然施之

無不如意二公當艱難之時
而能措置安平功業駿朗不
偶然也今天下學士大夫無
不搜討緗素琢磨文筆而於
本朝故實罕所措心以故刻

藻則有餘而應務則不足語
云高論百王不如憲章當代
余嘗得

高廟實錄副本恭誦數四雖莛
叩鐘音不測其洪蘊而運化

之迹有可曉睹觀夫當日立
制之初意與夫後來沿習浸
以失之末舉而本不存目設
而綱不振者蓋已多矣嘗欲
探其源流別其同異條其可

施於當今者數十事以爲能
行此數十事則治平不足言
矣而才識庸陋卒卒未能也
又念

祖制所以浸失者雖則奉行之

吏未能虔共厥職而其變易
亦有繇也蓋以法立而例生
始簡而後煩或小小補葺一
時一事人以爲便而移改旣
多形執頓垂向者

聖祖之制所謂如繩貫如絲連
一經一緯不復可識也然則
欲追復

祖制當先觀

列聖以來諸名賢之議論推其

所以出入於

祖宗之制度其爲損爲益輕重
較如則今日所以補救之宜
可得而知也余是以從陳宋
二子之後上承

郡大夫先生之旨收緝

明興以來名賢文集與其奏疏

凡數百家其爲書凡千餘種

取其文之關乎國事者凡得

如千卷夫條上故事俾我

明聖光復

祖烈者輔弼大臣之事也辨論
得失博采所聞以左右當事
者賢公卿之責也余雅意所
在不欲以文士自業然而身

賤素久無所用於世今之所
成豈敢妄希兩文忠之事乎
蓋賤者效焉貴者嘗焉他日
有魏弱翁其人者當國省覽
此書以爲有裨鹽梅之用庶

幾因是推其繇來以漸窺

高皇帝之淵微或有弘益哉或有弘益哉

華亭徐孚遠闇公氏題於
華隱堂

序

古者有記事之史有記言之史言之要者大都見於記事之文矣導發其端使知所繇條晰其緒使知所

究非言莫詳甚矣事之有
藉於言也而况宗臣碩彥
敷奏之章論難之語所謂
訐謨遠猷上以備一代之
典則下以資後世之師法

不爲之裒綴後之君子何
以考焉此予與徐子宋子
經世編所繇輯也

明興二百七十年海內治平
駕周漂漢賢才輩生勛在

竹帛而遺文緒論未有統
彙散於江海蓋有三患焉
一曰朝無良史二曰國無
世家三曰士無實學夫金
匱之藏非遠臣所知然有

大纂修莫不載在方冊永
樂中命閣臣士奇等輯名
臣奏議蓋前代纂備矣

昭代之文至今闕焉章奏貯
諸省中以待纂集幸無蠹

敗率割裂其義不足觀又
古者大臣沒或求其遺書
副在太史今無有也漢之
武宣及隋唐之盛遣使四
出懸金購書今無有也雖

欲不散軼安可得哉故曰
朝無良史六季以前無論
矣唐宋以科舉取士而世
家鼎族相望於朝家集宗
功藏之祖廟今者貴仕多

寒峻公卿鮮賢胤至有給
簡冊於爨婢易緗素於市
兒者即欲搜討文獻微矣
故曰國無世家俗儒是古
而非今文士擷華而舍實

夫保殘守缺則訓詁之文
充棟不厭尋聲設色則雕
繪之作永日以思至於時
王所尚世務所急是非得
失之際未之用心苟能訪

求其書者蓋寡宜天下才
智日以絀故曰士無實學
積此三患故成書也難夫
孔子觀於周蕭相收於秦
大率皆天下要書足以資

世用者嘉謨今典通今者
之龜鑒謀國者之兵衛也
失今不採集更數十年亡
散益甚後歿者之責其曷
諉焉予自幼讀書不好章

句喜論當世之故時從父
老談名公偉人之迹至於
忘寢及長而北之燕趙之
郊遊 京師凡諸司之所
掌輜軒之所及見其人未

嘗不問遇其書未嘗不藏
雖苦蹇陋多遺忘然布諸
載籍者概可見廬居之暇
因相簡輯徐子宋子皆海
內英俊予所稟則以幸厥

成者也雖呈漏缺失不敢
當記言之義使權家尚其
謀儒家守其典史家廣其
事或有取焉爾或曰晉漢
東平王求太史公書而大

臣以爲漢興之初謀臣奇
策地形阨塞在焉不宜賜
諸侯王今此書多議兵食
論形勢國之大計何以示
人予曰不然

祖宗立國規模宏遠

先朝大臣學術醇正非有縱
橫奇詭之論也夫王業之
深淺觀於人才之盛衰我
明旣代有翊運輔世之臣而

主上旁求俊乂用人如江湖
則是編也豈惟益智其以
教忠哉

華亭陳子龍題

鑒定名公姓氏

孫愷陽先生

錢機山先生

周挹齋先生

錢御冷先生

何象岡先生

方書田先生

陳眉公先生

張華東先生

鄭玄嶽先生

范質公先生

張石林先生

羅湘中先生

錢牧齋先生

惠元孺先生

董見龍先生

曹能始先生

陳益吾先生

孫意白先生

侯六真先生

黃東里先生

葛岷瞻先生

吳鹿友先生

方仁植先生

葉曾城先生

李素我先生

房海客先生

董邃初先生

宋先之先生

方孩未先生

徐厚源先生

許霞城先生

沈桐岡先生

李萍槎先生

王念生先生

沈雲中先生

馬瑤草先生

顧九疇先生

姜居之先生

張二無先生

蔡雲怡先生

鄭潛菴先生

曾霖寰先生

李若鶴先生

張異度先生

王澄川先生

黃石齋先生

盧九台先生

張玉筍先生

任文水先生

許朗城先生

王昆華先生

陳贊皇先生

王孺初先生

倪鴻寶先生

黃鶴嶺先生

王覺斯先生

孫松石先生

馮留仙先生

馮鄴仙先生

方禹修先生

何遠宿先生

徐寶摩先生

喬聖任先生

馮忝生先生

吳朗公先生

張六銷先生

華鳳超先生

唐梅臣先生

徐大玉先生

黃東涯先生

熊魚山先生

項水心先生

宋九青先生

鄭澹石先生

陳平人先生

翁水因先生

張鯢淵先生

侯豫瞻先生

李括蒼先生

何玄子先生

楊方壺先生

盧德水先生

袁臨侯先生

李子木先生

周芮公先生

路皓月先生

趙匡谷先生

唐存少先生

黃元公先生

金子駿先生

管誠齋先生

金伯玉先生

史道隣先生

張愛先先生

賴宇肩先生

劉胤平先生

張初叟先生

曹履垣先生

徐勿齋先生

曹峨雪先生

梁眉居先生

姚永言先生

王園長先生

徐錫餘先生

孫魯山先生

徐蓼莪先生

宋令申先生

葉大木先生

胡去非先生

李懋軒先生

周仲馭先生

陳嘿菴先生

馬素修先生

王炳葵先生

熊雪堂先生

楊機部先生

朱子美先生

吳嘿寘先生

許平遠先生

屠愚仙先生

成寶慈先生

張太羹先生

張天如先生

王有三先生

陳大來先生

羅紋山先生

吳駿公先生

劉念先先生

徐退谷先生

沈蒼嶼先生

錢大鶴先生

胡平六先生

程九屏先生

楊幼麟先生

李寶弓先生

李唐谷先生

吳來之先生

左大來先生

文用昭先生

陳幾亭先生

朱聞玄先生

馬培原先生

袁特丘先生

陳大士先生

王依日先生

黃禎臻先生

周彝仲先生

姜神超先生

陳寒山先生

翁象韓先生

吳存初先生

楊扶曦先生

李香巖先生

唐損占先生

劉晉卿先生

倪伯屏先生

陳武匡先生

李載陽先生

唐敏乙先生

錢希聲先生

陳素菴先生

廖孟符先生

唐瞿瞿先生

吳雪因先生

張公亮先生

周簡臣先生

趙景之先生

吳人撫先生

黃仲霖先生

洪西巖先生

余賡之先生

熊伯甘先生

曹秋嶽先生

吳志衍先生

趙黃澤先生

時子求先生

高彙旃先生

顧餘拭先生

牛鶴沙先生

許平若先生

袁與立先生

施沛然先生

夏瑗公先生

吳坦公先生

包長明先生

張又仲先生

凡例

一儒者幼而志學。長而博綜。及致治施政。至或本末眩瞽。措置乖方。此蓋浮文無裨實用。擬古未能通今也。唐宋以來。如通典通考。暨奏疏衍義諸書。允爲切要。亦旣繁多。乃

本朝典故缺焉。未陳其藏之金匱石室者。聞見局促。曾未得覩記。所拜手而獻。抵掌而陳者。若左右史所記。小生宿儒。又病於抄撮不足。

揄揚盛美。網羅前後。此有志之士。所撫膺而歎也。徐子乎遠。陳子子龍。因與徵璧取

國朝名臣文集。擷其精英。勒成一書。如采木於山。探珠於淵。多者多取。少者少取。至本集所不載。而經國所必須者。又爲旁采。以助高深。共爲文五百卷。有奇。人數稱是。志在徵實。額曰經世云。

本朝

二祖

列宗聖詰相繼。作人養士。蘊毓涵淪。昌明之運。太平累葉。人才之盛。周漢以來。所未嘗有。然異同升降。抑亦可考。

高

文二朝開天。理物之佐。大者比勛臯禹。次者儷美蕭曹。然其英謀讜論。見於文章者。寥落無聞。

意造膝詭辭。世莫得聆者歟。至

仁

宣而後。俗尚醇龐。士貴器度。其人類溫良而博厚。
其文多簡質而平易。此一盛也。及

英

景而後。訖於

孝宗。士生其間。所趨不同。大要以氣幹節槩爲主。
或貞固強力爲國家任大事。或清端直諫爲

國家寢大奸。疆有虎臣。朝有耆德。又一盛也。
武皇之季。隙由裨政。而偉人傑士。王國克生。意天
以肇。

肅皇中興之治乎。其時士大夫。博通敏幹。足以倚
辦。故

肅皇雄才大度。驅使豪傑。迭用迭舍。未嘗乏竭。至
繼世以後。而碩輔信臣。相與解單于之辦。烽
火不起五十餘年。豈非得人之效哉。是班生

所以致歎於孝武也。此又一盛也。

神祖當豐亨豫大之時。恭已無爲。而朝論漸分。黨議斯起。於是矜重氣節。標尚議論。爭

國本。擊礦稅。辨綸扉之邪正。訟計典之枉直。以至視朝起廢。披鱗請劔。章滿公車。豈非公論最伸。而清議足傳歟。此又一盛也。至

熹宗在御。宵人竊柄。閉隱之歎。於斯爲極。我

皇聿興。如離始照。十年之間。宵衣旰食。而太平未

臻殷憂日切。夫國家之景運。旣如彼。我

皇之聖明。又如此。必有異人並出。以助緝熙。不愧
蕭皇之世者。當拭目觀其盛耳。予與徐子陳子論
昭代人才之槩。而於名公貴卿。深有望云。

一天下有一定之理。有萬變之事。正心誠意
之言。親賢遠佞之說。治忽之分。罔不由茲。然
義簡而直。數語可盡。故集中惟元臣正士。入
告我

后者載數十首。以槩其餘。至於萬變之事。代不同制。人各異師。苟非條析講求。何以規摹得失。若乃方幅之內。或以迂闊見譏。廓落之談。復以功利相擯。鄙人不敏。敬聞命矣。

一天祿石渠。推爲仙苑。然圖書之府。如東觀蘭臺。牙籤玉軸。七略四部。各有副餘。至若

本朝

二祖

列宗文謨武訓制作輝煌。或親灑

宸翰。或儒臣纂成。藏於祕館。心畫所形。洵足軌
範百王。昭垂萬代。惟是紀言紀事。厥有專司
而治體事功。人文國典。關係一代。夫采野史
則多失實。蒐家乘則恒溢美。斯編折衷兩端
間有標識。庶竊取乎識小之義。爲異日作史
之資云爾。

一從遊賡歌。爲太平之本。銘功頌德。備盛世

之章

仁

宣以前。略載其文。以見我

明致治之由。邳隆之運。其後

敬皇泰交。多握手之語。

世宗制作。饒典頌之文。要以章疏爲重。故不詳錄。

一河嶽英靈。誕生名世。風雲之會。爲龍爲蛇

或將或侯矣夫

太祖之制。非係軍功。不容封賞。乃開國以降。文臣得封者。可以指屈。或因緣時會。或崇尚拳武。律之儒將。俱非本色。若劉青田。王文成。忠智有餘。功勒鐘鼎。雖有議者。吾無間然。

一古之傑士。言足載道。不爲雕飾。如薛文清。岳文毅。劉忠宣。章文懿。羅文肅。顧文端。馮恭定。高忠憲之徒。有日星河嶽之望。乃吉人辭寡。於斯足徵。錄其數篇。以爲模範。

一國初武臣固多人傑。下掩寇鄧。上步韓陳。而語言文采不少槩見。後若張定興。楊穎國。郭定襄。戚少保之流。或橫槊而成。或授簡記室。雄心可寄。壯猷足錄矣。

一

本朝文士。風雲月露。非不斐然。然求之經濟。十不一二。至若宋文憲之精粹。李空同之諒直。王浚川之練達。王弇州之博識。寧非卓爾之

姿濟世之彥哉。罕有通才。未當一槩。其他若
丘文莊。霍文敏。馮文敏。徐文定。學術淵深。足
爲世用。一稱立言之家。一爲實用之準。

一士人遇合。或富貴自有。才位相符。又或僨
轅負乘。一跌不振。其有長才大略。橫遭謗議。
賢人君子。混跡抱關者。若龐總督之弘通。林
次崖之恢闢。霍勉齋之詳整。徐伯繼之切實。
王東溟之淹雅。葉綱齋之明密。乃鵬翼先凋。

驥足未展。雖跡近沉冥。而事多衝要。卽憂時之替計。發幽夜之逸光。要使覽者考其遺文。畱連時遇窮達之際。無間焉爾。

一異同辨難。特以彼我未通。遂成河漢。就其所陳。各成一說。如大禮之議。張桂與新都並存。河套之復。襄愍與東涯各異。一密哈也。或主閉關。或主授爵。一倭奴也。或主封貢。或主征討。又若軍伍之虛實。邊牆之修廢。膠萊海

運之通塞得失雖殊。都有可採。不妨兩存。以俟揀擇。

一此書非關彰瘴彈劾之文。不能盡錄。著其大者。非名教所裨。卽治亂攸關。若乃其言足存。不以人廢。分宜老奸。秩宗之文。采其數篇。特於卷首。直斥其名。若近者熊芝岡。剛悖自用。已經服法。然籌策東隅。多有英論。無諱之朝。可以昭揭。其他大臣有陰柔之號者。邊臣功

足掩過者。僅以其文。不暇評論。

一

高皇詔廢中書。

文皇政歸內閣。三楊秉鈞而後。勢以益重。至嘉隆之間。幾幾真相矣。若洛陽餘姚之讜亮。永嘉丹徒之才略。新都華亭之弘博。新鄭江陵之英毅。山陰歸德之端方。內輔君德。外總機務。朝政之清濁。海內之安危。職任綦重。裒輯尤

論

一冢宰統率百揆。然九品既設。三途並登。科舉重而德行衰。資格錮而賢才絀。此其大較也。第重守令。一內外均勞逸。一時雖奉爲成書。轉瞬咸知其虛語。夫循資序級。可避嫌疑。精選審官。不出學問。是以鑑別妍醜。必濯水壺。載量短長。要須玉尺矣。

一國之大事。惟在戎索。董正六師。以匡王國。

惟大司馬是賴。強本弱枝。制變弭患。雖事難
踰度。而枕席度師。或躬親簡練。而旌麾改色。
本朝如于忠肅。王莊毅。項襄毅。俞肅敏。馬端肅。
劉忠宣。王恭襄。李康惠。王康毅。王襄敏。楊襄
毅。諸公之在樞密。尤爲矯矯。廣收詳著。以資
撻伐。

一國家外夷之患。北虜爲急。兩粵次之。滇蜀
又次之。倭夷又次之。西羌又次之。誠欲九塞

塵清。四隅海燕。方叔召虎。一時咸慕風采。奕世猶仰威名。指受方略。半係督撫。如北摧勁虜。則諱于王威寧。南伐麓川。則諱于王靖遠。兩廣寇亂。則諱于韓襄毅。勦滅土達。綏戢荆襄。則諱于項襄毅。處置寧藩。則諱于王文成。河套恢復。則諱于曾襄愍。倭奴抄掠。則諱於胡少保。戚總戎。唐荆川。順義封貢。則諱于王鑑川。平播則諱于李襄毅。水蘭地界。則諱于

郭青螺。西征則詳于梅客生。東征則詳于宋
桐岡。若經略奴酋。則詳于熊芝岡。撫賞插部。
則詳於王霽宇。水西本末。則詳于朱恒岳。姑
舉數端。以該遠近。至于山川扼塞之形。營陣
車騎之制。部落種類之異。測候偵探之法。凡
可資於韜鈴。罔弗施夫羅弋。

一當世所急。民窮本患。至徵兵輸餉。所在騷
騷。然乞活鼠竊。已經數見。雖同感風。旋卽草

薙。當時縑索在我。勦撫互施。取則不遠。皆爲前鑑。其謀可垂遠。事多切今者。披采無遺。庶厲志請纓。仗劔討賊者。知所審焉。

一安上治民。莫大乎禮。若朝覲會同。郊祀燕享。冠婚賓射。及

天潢之裁制。外夷之賓服。莫不厥有常經。宏以通變。故凡議禮諸家。同異論難。迄無定說。苟援引經史。根據典實。確然不磨者。皆爲博采。

豈惟多識之助。抑亦後事之師。

一司農專領度支。豐儉盈縮。必資心計。夫帝王之本務。墾土力田。富強之雄資。官山煮海。若乃出入不符。本末並失。縱憑修綆。難言巧炊矣。故廣屯種。興鼓鑄。汰冗濫。準食貨。其大端也。若徐文定之農書。袁運司之鹽法。摘其成著。良可孤行。茲特表而出之。

一明罰勅法。司寇是賴。然民狎民畏。仁人所

以救世。世輕世重。君子首宜盡心。夫一跌不可贖者刑也。一成不可壞者例也。罪惟五等。例有萬條。覽于斯編。失入失出。交譏焉爾。

一冬官之任。最爲繁劇。夫代材架屋。大匠爲衆人之師。利用前民。小物而衆工所聚。非精研無以鑑別。卽歷練未能周知。有若劉莊襄之造車。余肅敏之修邊。潘司空之治河。徐文定之制器。考其遺制。允爲國工。

一予少遊燕趙。見雄邊子弟。據鞍顧盼。心竊好之。然每遇神駿。未能辨別。向擬上自周秦。下至今茲。細而種類年齒之殊。大而生長蕃育之道。俱爲寫其形容。詳其沿革。乃日回月轉。有志未逮。夫以走逐飛。必須良產。違害就利。莫如官牧。觀乎斯編。可知駟政廢修之因。并識夷夏強弱之勢矣。

一郡公 禹翁方師。素抱安濟之略。聿登著

作之堂。居恒揚藝論文。窮日不倦。其訓迪士
子。專以通達時務爲亟。經世一編。尤所注意。
退食之餘。首勤評閱。雖一麾出守。十年不遷。
而窮達一致。喜愠不形。亮節貞心。于斯可見。
一子輩志識固陋。鮮所取衷。幸高賢大良。一
時雲會。若李寶翁先生。李載翁先生。王依翁
先生。吳雪翁先生。皆具良史之才。宦游吾土。
士紳咸奉規範。此編出入。共稟 鑑裁。遭逢

之盛。良爲侈矣。

一執友陳眉公先生。棲心隱逸。道風映世。丹砂峒嘯。渺然塵外。其孫希天仙覺。才氣英邁。甫係髫齡。熟于史學。予輩山齋信宿。時承提命。每至夜分。因得稔識。前言往行。此編去取。多所商確。皤皤黃髮。非特後輩典型。允爲

熙朝文獻矣。

一同郡先輩。若徐厚翁先生及唐繕部存少。

聞予輩搜借艱苦。俱發鄰架之藏。悉供傳寫。至許霞翁先生。移書遠近。廣收博覽。裨益尤多。若徐勿齋。馬素修。張西銘三先生。及張受先。黃仲霖。吳志衍。夏彝仲。吳坦公。搜軼編於吳越閩浙。張訥叟。吳來之。朱聞玄。郵遣集於齊魯燕趙。他若宛平金伯玉。鉉。王敬哉。崇簡。崔道。母子忠。王大含。谷。桐城方密之。以智。孫克咸。臨。萊陽宋澄。嵐。繼澄。侯官陳道掌。元。繪。

陳克理兆相。金沙周介生鍾。丹陽荆實君廷
實。樵李錢孚于嘉徵。錢彥林旻。錢雍誦洋。黃
復仲子錫。陸芳洲上瀾。朱子莊茂暉。歸安唐
子儀起鳳。虎林嚴子岸渡。張幼青舉。茂苑楊
維斗廷樞。許孟宏元溥。姚瑞初宗典。姚文初
宗昌。玉峯王與游志慶。吳江周安期逢年。吳
日生易。嚳水侯雍瞻岐曾。傅令融凝之。婁東
王子彥瑞國。吳純祐國杰。張無近王治。維揚

鄭超宗元勳。海虞顧麟士夢麟。彭城萬年少
壽祺。皆係良友素知。瓊瑤之贈。遙睇臨風。二
酉之臧。傾廂倒篋矣。

一四方蘭譜。若楊子常弄。楊龍友文馳。則分
教吾土。樂與晨夕。其他諸友。或夙係同好。或
本未謀面。但曾任較讐。暨名集惠寄者。俱登
姓氏。不沒其實。

一此集始于戊寅仲春。成于戊寅仲冬。寒暑

未週而披覽億萬。審別精詳。遠近嘆咤。以爲神速。良由徐子陳子。博覽多通。縱橫文雅。並用五官。都由一目。選輯之功。十居其七。予質鈍才弱。追隨逸步。自嗤寒拙。以二子左縈右拂。奔命不遑。間有選輯。十居其二。若溯厥始。事則周勒卣立勳。李舒章雯。彭燕又賓。何慤人剛。徐聖期鳳彩。盛隣汝翼進。及家伯氏子。建存標。家季轅文徵輿。咸共商酌。適李子久

滯京邸。周子壯遊梁苑。彭子棲遲邗上。何子
寄跡鴛水。徐子盛子。則各操月旦。伯氏家季。
則潛心論述。曾無接談之暇。未假專日之工。
若友人吳繩如。嘉胤。唐尹季允諧。李存我待
問。張子美安茂。朱早服積。蔡季直樵。單質生
恂。郁子衡汝持。沈臨秋泓。陸子玄慶會。朱宗
遠灝。董士開雲申。郁選士繼垣。張子服寬。張
子退密。錢子璧鼓。李素心愴。徐惠朗桓鑿。邵

霏玉梅芬。徐武靜致遠。李原渙是樵。華芳乘
玉芳。皆卓然命世之姿。夙具同心。咸資討論
一茲編義在救時。無取掠美。盛者並列數部
少者僅登一齋。當不以所載多寡。軒輊昔賢
若乃卷帙舛錯。配合參差。則以困于酬應。未
遑一一整齊。見嗤名輩。知所不免。

一名臣爵里姓氏。具載獻徵諸書。然多有掛
漏。遍搜羣籍。頗廢歲時。茲以卷帙浩汗。難於

稽考。分條析緒。復于卷首。另編總目。使覽者
開卷燎然。特爲詳便。此則友人謝提月廷楨
一人所輯。其功不可泯也。

一藏書之府。文集毘少。多者百種。少者數家。
四方良朋。惠而好我。發緘色動。及至開卷。恒
苦重複。予等因遣使迭出。往復數四。或求其
子姓所藏。或托于宦跡所至。搜集千種。繕寫
數萬。至條陳冗泛。尺牘寒暄。及文移重疊。又

悉加剪截。乃成斯集。雖未敢云

聖朝之洪謨。亦足當經世之龜鑑矣。

一

國朝太平三百載。文獻之盛。無過今時。然而世祿之家。忘其先功。名卿之後。或降阜隸。其他湮滅而無聞者。何可勝計。如韓襄毅徐武功。皆本吳產。襄毅疏草。武功文集。訪其後人。竟未可得。瑯琊纓簪累葉。代有文人。而思質司

馬之集。已失其半。靈寶四許。鼎盛一時。問宦其地者云。諸集皆已散軼。訪求之難。大槩可見。以故名公鉅卿。不能盡備。海內同志。有司空之富者。幸惠寄抄錄。以俟續選。

一此編以詳備爲主。極目賞心。初無限制。及工已告竣。而又得名集百部。予輩悉欲摭錄。乃書賈捆載。遲重爲嫌。難于行遠。凡係續收。割入續集。

一茲編體裁期于囊括典實。曉暢事情。故閣部居十之五。督撫居十之四。臺諫翰苑諸司。居十之一。而鱗次位置。則首先代言。其次奏疏。又其次尺牘。又其次雜文云。

華亭宋徵璧漫記

皇明經世文編姓氏爵里總目

宋

濂字景濂浦江人元時爲翰林編修高帝徵至金陵除江南儒學提舉授太子經洪武九年翰林學士承旨致仕正德中謚文憲

劉

基字伯溫青田人元時爲處州府判棄官歸

高帝聘至金陵吳元年拜御史中丞三年加弘文閣學士封誠意伯八年賜告歸卒正德九年特贈太師謚文成

王

禕字子充義烏人元時上書時宰不報隱青

巖山戊戌徵至金陵署中書省掾累官翰林侍制洪武五年六月使雲南被害建文元年贈翰林院學士奉議大夫謚文節開國以來文臣得謚者自公始正統六年改謚忠文

宋 訥字仲敏滑縣人元時舉進士洪武十三年徵至除國子助教十五年初置殿閣大學士遂以公爲文淵閣臣後遷祭酒最稱職二十三年卒于官年八十正德中謚文恪

貝 瓊字廷珺崇德人隱居爰山洪武初徵修元

史累官國子助教博士

蘇伯衡字平仲或曰名平仲字伯衡子由九世孫
金華人元鄉貢進士入明選爲國子學錄陞學
正擢國史編修以疾辭二十一年徵爲考試官
復辭歸以壽終于家

朱升字允升休寧人元鄉貢進士王師下徽州
召見吳元年授翰林侍講學士知制誥同修國
史洪武二年致仕

桂彥良初名德稱以字行慈谿人元鄉貢進士洪

武六年徵至闕下擢太子正字十一年授晉王府右傅十三年罷王府傅相改長史司右長史十八年以疾賜歸

葉伯巨字居升寧海人以明經陞入太學分較平遙縣洪武九年應詔陳言觸上怒庾死獄中

方孝孺字希直一字希古寧海人洪武十五年以薦召見二十五年又以薦授漢府教授蜀獻王聘爲師建文卽位召爲侍講學士比定官制改爲文學博士靖難起中朝詔檄皆出公手遂死

節焉萬曆時賜諡正學

練子寧名安以字行新塗人洪武十八年進士第
二擢翰林修撰陞副都御史工部侍郎建文卽
位陞吏部又改御史大夫死於靖難

解 縉字大紳吉水人洪武二十一年進士以庶

吉士改御史坐罪歸凡數年以違詔奔喪謫海
州衛吏建文元年召入翰林待詔靖難後召入
文淵閣以論交阯失旨遂出爲叅議永樂八年
入奏事會上北征公爲高煦所奏下詔獄十三

年卒

王叔英字元采黃巖人洪武二十年薦起累官翰林修撰靖難兵起公奉詔至廣德州遂自經楊文貞其所薦士也

姚廣孝初名天僖長洲人至正間爲僧改名宗衍字斯道洪武四年詔取高僧公至金陵未幾從燕王之國靖難兵起軍中進止皆公叅贊悉中機宜改爲左善世厚少師復姓改今名上令蓄髮懇辭十六年卒贈太師榮國公謚恭靖

張輔祥符人河間忠武王子也以靖難功歷

指揮同知初封新城侯三下交南進封英國公
正統十四年死于土木之難景泰元年贈定興
王謚忠烈

蹇義字宜之巴人洪武十八年進士授中書舍

人建文卽位陞吏部右侍郎靖難後轉左仕至
吏部尚書正統元年卒贈太師謚忠定

夏原吉字維喆湘陰人由鄉薦授戶部主事建文

卽位陞右侍郎靖難後轉左進尚書永樂時治

水江南諫北征繫內官監仁廟卽位復戶部尚書宣德五年卒贈太師謚忠靖

楊士奇初名遇以字行泰和人建文以薦舉除吳府審理副靖難後改編修入直文淵閣文皇北征兩下公獄卒釋之累官少師兵部尚書正統八年卒贈太師謚文貞

楊榮初名子榮字勉仁建文二年進士爲翰林編修靖難後召七臣入內閣公年最少上更名榮以公曉暢軍旅累從出塞進文淵閣大學

士工部尚書陞少傅卒贈太師謚文敏

金幼孜名善以字行新淦人建文元年進士乙科授戶科給事中靖難後入內閣屢從北征榆木川之變實護喪焉累官太子少保禮部尚書宣德六年卒贈少保謚文靖

胡儼字若思南昌人洪武二十年鄉舉會試乙科授華亭教諭永樂初授翰林檢討與解縉等七人同入闕尋出爲國子祭酒洪熙元年以太子賓客致仕年八十三卒

胡澐字源潔武進人建文二年進士永樂中爲

給事中累官禮部尚書加少傅天順元年卒年八十九謚忠安

黃福字如錫昌樂人元鄉貢士洪武中上書論

大計上奇其才三十一年超陞工部右侍郎永樂初郡縣交趾公以尚書總理藩憲宣德中累陞至南京戶部尚書兼掌兵部留都有文臣叅贊機務自公始也正統五年卒謚忠宣

李時勉名懋以字行安福人永樂二年進士以庶

吉士授刑部主事讒搆下獄二十一年出獄復
其官獻陵卽位公具疏諫 上怒縛至便殿命
力士捶十八瓜折其肋幾死明日改監察御史
明日又下獄宣德元年 上以公觸仁考怒命
斬公西市公得見 上上憐之復其官尋陞學
士正統三年陞祭酒景泰元年卒謚文毅

鄒 緝字仲熙吉水人洪武中以明經薦舉永樂
時官至左庶子

王 翱字九臯沿山人永樂十三年進士以翰林

院庶吉士歷陞僉都御史正統初鎮守江西四年贊理松番六年鎮陝西七年提督遼東軍務遂留撫十二年出塞破虜尋陞左都御史景泰三年召還臺加官保成化三年致仕卒贈太保謚文肅

周忱字恂如吉水人永樂二年進士改庶吉士授刑部主事宣德五年擢工部右侍郎巡撫江南凡在任二十二年累陞戶部尚書卒年七十

三謚文襄

孫原貞初名瑀以字行德興人永樂十三年進士

授禮部主事正統中歷陞布政以平盜功進兵

部尚書巡撫浙江天順初致仕成化十一年卒

周叙字功叙吉水人永樂十六年進士累官至

翰林侍講學士雖以文學爲職尤注意國事前

後章論剗切

吳節字與儉安福人宣德五年進士由庶吉士

景泰天順中歷陞太常寺卿兼侍讀學士尋致

仕成化十七年卒賜祭葬

王直字行儉永樂二年進士庶吉士宣德初進少詹正統八年爲吏部尚書裕陵復位請老去卒年八十四贈太保謚文端

楊溥字弘濟石首人建文二年進士爲翰林編修靖難後爲東宮洗馬上北征官僚輒下獄公一繫十年獻陵卽位釋陞太常卿兼學士入內閣累陞至少保正統十一年卒贈太師謚文定

陳循字德遵太和人永樂進士第一拜修撰景

泰初累遷學士入內閣進戶部侍郎再進尚書
英廟復辟謫戍遼東天順五年釋歸

王

驥字尚德東鹿人永樂四年進士由兵科給

事中歷仕順天府尹宣德二年陞行在兵部侍郎坐事下獄尋復陞尚書正統二年總甘涼軍務虜引去六年征雲南大捷封靖遠伯天順元年復兼兵部尚書加祿四年卒年八十三贈侯謚忠毅

范

濟元末人入明因事謫戍興州衛宣德初上

書言事

上感其言擢爲司訓

陳敬宗字光世慈谿人永樂二年進士改庶吉士累官至南京國子監祭酒凡在任二十餘年諸生多位至卿貳公獨久不調意豁如也天順三年卒年八十三謚文定

劉球字求永安福人永樂十九年進士由禮部

主事改翰林侍講王振忌公死于獄景泰初贈翰林學士謚忠愍

薛瑄字德溫河津人永樂二十年進士擢御史

正統元年初設提學憲臣公出爲山東僉事尋
召大理少卿三楊欲公一見璫振公正色拒之
振誣公繫獄十四年起大理丞禦虜北門復辟
以禮部侍郎兼大學士入內閣天順八年卒謚
文清

岳

正字季方正統十三年進士及第授編修天

順元年改修撰尋召入內閣曹石忌公才以飛
語中之不數月內批除欽州同知復爲其黨中
公私事下公獄謫戍肅州曹石忌上思公放

歸田陞興化知府三年致仕未幾卒嘉靖中贈太常卿謚文肅

于

謙字廷益錢塘人永樂十九年進士宣德元

年授御史從討漢庶人巡按江西五年陞兵部右侍郎巡撫晉豫時年三十三上北狩公輔邲王景泰時加兵部尚書太子太保復辟後以構誅成化二年復公官弘治三年特贈太傅謚肅愍後改忠肅

朱

鑑號簡齋晉江人永樂十五年鄉舉正統十

三年以僉都御史巡撫山西十四年移守鴈門
尋陞副都仍前任景泰三年致仕

李

賢字原德鄧州人宣德八年進士正統元年

授驗封主事陞選郎十四年扈駕土木景帝立
陞兵部右侍郎尋改戶部天順元年入內閣曹
石潯公與武功伯同下獄尋釋調福建叅政瀕
辭仍留吏部侍郎進尚書八年太子卽位進少
保成化二年外艱詔起復是年冬卒贈太師謚

文達

徐有貞初名程後改今名字元武吳人宣德八年
進士改庶吉士景帝卽位擢御史四年河決陞
僉都御史治河績最著後以奪門功陞兵部尚
書封武功伯世指揮使入內閣爲曹石所譖下
獄謫廣東叅政行至德州復逮詔獄論斬會災
變得宥編置金齒後賜歸田卒于吳

商輅字弘載淳安人宣德乙卯發解正統九年
會試十年廷試皆第一景帝監國入內閣歷陞
太常寺卿兼翰林學士天順復辟除名成化二

年驛召至京復入內閣累陞吏部尚書謹身殿
學士十三年加少保致仕卒贈太傅謚文毅

王 恕字宗貫三原人正統十三年進士改庶吉
士累遷江西河南布政使成化元年陞右副都
御史正德六年進尚書卒年九十三贈太師謚
端毅

郭 登字元登武定侯英諸孫也永樂二十二年
充勲衛正統初屢立戰功陞指揮僉事十四年
上北狩公守大同景泰初曾以八百騎破虜數

萬戰功第一歷陞左都督封定襄伯天順元年
奪爵尋請戍未幾召還充團營總兵卒贈侯謚

忠武

張純江陵人永樂十九年進士景泰三年爲左

副都御史尋陞南兵部尚書天順元年致仕卒

劉斌順義人正統十年進士景泰中爲給事中

楊洪六合人祖政以軍功世漢中百戶公嗣官

調開平累功陞都指揮正統元年以都督守獨
石十三年封昌平伯十四年上北狩公守宣

府坐事下獄尋出公禦虜有功進封侯景泰二
年還鎮宣府卒贈穎國公謚武襄

馬

昂字志高滄洲人由鄉舉入國學薦陞監察

御史正統八年陞副都御史叅贊甘肅軍務尋
致仕景泰四年薦起總督軍務巡撫兩廣天順
二年陞兵部尚書四年致仕卒贈少保謚恭襄

李

賓字廷用順義人正統十年進士授御史景

泰時歷陞副都御史天順初年以平曹吉祥之
亂進左都加太子少保成化十三年致仕弘治

十八年卒贈太子太保謚襄敏

楊鼎字宗器咸寧人正統四年進士授翰林院

編修常建言修飭戎備通漕三邊不果行胡虜大舉詔公撫守近畿經略有功累遷至戶部尚書成化十五年致仕二十一年卒謚莊敏

白圭南官人正統七年進士除監察御史尋陞
湖江布政天順改元轉都御史巡撫湖廣累陞
兵部尚書以軍功進太子少保十一年卒

李秉字執中曹州人正統元年進士爲監察御

史景泰二年公以僉都叅贊宣府軍務總督邊
儲繼巡撫遼東成化二年以軍功加太子少保
還臺四年爲吏部尚書五年致仕卒謚襄敏

王 竑字公度江夏人正統四年進士初爲戶科
給事中景泰初陞僉都御史守居庸二年總漕
淮上兼巡撫清理鹽法復辟謫淞江叅政尋除
名天順五年起公兵部尚書未幾去位卒正德
中謚莊毅

周弘謨字堯謨長寧人正統十年進士歷官翰林

官坊成化十四年陞禮部右侍郎十六年陞尚書二十三年加太子少保弘治元年致仕三年卒謚文安

耿裕字好問平定人景泰五年進士由庶吉士爲工科給事中以父清惠公在內臺改檢討成化二十二年進禮部尚書尋改南弘治元年召尚書禮部六年復尚書吏部弘治八年卒贈太保謚文恪

林聰字季聰寧德人正統四年進士由刑科給

事中景泰三年議易儲忤旨改司直裕陵復廢
超陞都御史巡撫大同累陞刑部尚書太子少
保卒贈少保謚莊敏

項忠字蓋臣嘉興人正統七年進士授刑部主

事扈上北狩羈虜中飼馬走七晝夜達宣府

陞陝西按察使天順三年以副都御史留撫四
年討平土達滿四六年討荆襄流民累陞兵部
尚書汪直惡公落職尋直敗復官卒贈太子太
保謚襄毅

章 綸字大綸樂清人正統四年進士爲南京禮

部主事屢有論建景泰中疏言 上皇汪后及

沂王 上怒下公獄復辟拜禮部侍郎尋改南

京吏部成化十二年卒特贈尚書謚恭毅

鍾 同字世京永豐人景泰二年進士三年授御

史每陳時政闕失因被杖凡三下獄竟死獄中

後贈大理寺左寺丞謚恭愍

劉定之字主靜永新人正統元年進士由翰林編

修歷陞通政司叅議兼侍讀成化二年召入內

閣累進禮部侍郎凡三年卒贈禮部尚書謚文
安

彭時字純道安福人正統十三年進士第一歷
官翰林侍讀與商輅同入內閣景泰初以憂去
天順元年復入內閣成化五年進吏部尚書大
學士如故十一年陞少保卒贈太傅謚文憲

王崇之北直滑縣人天順元年進士

張海字文淵德州人成化三年進士由戶科給

事中累陞順天府尹弘治二年陞兵部侍郎未幾降山西叅政弘治十年致仕卒

張寧字靖之海鹽人景泰五年進士拜給事中

英宗將大用之爲大臣所忌陞汀州知府尋卒

劉翊字叔溫壽光人正統十三年進士由庶吉

士累陞侍講成化十年陞吏部左侍郎明年兼

翰林學士入內閣累進太子太保謹身殿大學

士公惡鄙萬安卒爲所中二十一年致仕去贈

太保謚文和

劉健字希賢洛陽人天順四年進士授編修成化中累陞少詹弘治元年陞禮部侍郎召入內閣累進至少傅十八年進左柱國支正一品俸正德初逆瑾恨公奪公官瑾誅得復致仕嘉靖時卒年九十四贈太師謚文靖

李東陽字賓之茶陵人以神童景帝召見成化三年進士由翰林庶吉士累陞侍講學士弘治八年入內閣十一年以太子出閣加太子少師

禮部尚書兼文淵閣大學士正德初劉謝皆去

公獨留尋致仕歸正德 年卒贈太師謚文正

韓 雍字永熙吳人正統七年進士爲監察御史

景泰時以薦陞僉都御史巡撫江西年未三十
天順二年巡撫大同戎政大治七年陞兵部侍郎
郎天順末年坐事左遷成化元年以都御史贊
理兩廣軍務討平斷藤峽開府梧州公得承制
專決尋引疾歸卒年五十三謚襄毅

姚 夔字大章桐廬人正統七年進士爲吏科給

事中景泰初超陞南京禮部侍郎成化七年滿

九載加太子少保未幾卒贈少保謚文敏

葉

盛字與中崑山人正統十年進士由兵科給

事中景泰三年陞叅政督宣府軍餉天順二年
召爲僉都御史巡撫兩廣成化五年陞禮部侍
郎改吏部卒年五十五謚文莊

原

傑字子英陽城人正統十年進士由監察御

史歷陞右副都御史巡撫山東尋督撫江西兼
撫荆襄進南京兵部尚書成化十三年卒贈太

子少保謚襄敏

余子俊字士英青神人景泰二年進士初授戶部郎歷陞副都御史巡撫延綏十三年爲兵部尚書凡兩出總督二十三年以左都御史致仕卒年六十一贈太保謚肅敏

馬文升字負圖鈞州人景泰二年進士爲御史巡晉楚有名累官至太子太師吏部尚書正德三年致仕五年卒贈太傅謚端肅

徐溥字時用宜興人景泰五年進士累官吏部侍郎泰陵卽位入內閣陞尚書弘治七年加少

傅十一年卒贈太傅謚文靖

楊守陳字維新鄞人景泰二年進士由司經洗馬
陞吏部侍郎屢疏請老以尚書致仕成化末卒
謚文懿

何喬新字廷秀廣昌人景泰五年進士初授南禮
部主事成化十七年陞副都御史巡撫山西督
三關兵事尋召爲刑部尚書請老卒謚文肅

秦紘字世纓單人景泰二年進士初爲南京御
史劾中官降北黃驛丞累陞叅政成化十八年

陞僉都御史巡撫宣府尋改河南弘治三年以
右都御史總制兩廣軍務四年陞南京戶部尚
書十一年致仕十四年召公以原官兼憲職巡
撫陝西加太子少保十八年卒贈少保謚襄毅

王 越字世昌濬人景泰二年進士爲御史有名

天順末以副都御史巡撫大同成化初陞陞左
都御史掌院事十三年加太子太保兵部尚書
屢出大同以軍功封威寧伯十八年奪公封編
管陸安弘治十年起公總制寧夏甘涼軍務加

少保兼太子太傅十一年卒軍中贈太傅謚襄

敏

丘 濬字仲源瓊山人景泰五年進士由庶吉士

累陞禮部侍郎掌國子監事弘治元年陞禮部

尚書四年加太子太保兼文淵閣大學士入內

閣八年卒贈太傅謚文莊

倪 岳字舜咨錢塘人天順元年進士歷陞侍讀

學士成化十三年召入吏部爲尚書十四年卒

贈少保謚文毅

劉大夏字時雍華容人天順八年進士爲庶吉士
授兵部職方郎中弘治六年以浙江左布政擢
右副都御史治河十年虜入塞以戶部侍郎出
經畫十三年總督兩廣尋陞兵部尚書正德元
年致仕劉瑾矯制下公獄尋赦歸瑾誅復官卒
贈太保謚忠宣

彭韶字鳳儀莆田人天順元年進士爲刑部郎
建言兩下詔獄成化六年陞四川按察使歷陞
都御史巡撫江南順天弘治初入爲吏部侍郎

四年尚書刑部六年致仕卒贈太子少保謚惠安

白 昂武進人天順元年進士累官左都御史成化七年爲刑部尚書加太子太保十二年致仕十六年卒贈太保謚康惠

徐 恪字公肅常熟人成化二年進士以葉文莊疏薦擢御史十一年陞湖廣叅議累官至工部侍郎卒

鄒 智字汝愚合州人成化廿三年進士爲庶吉

士已酉以公妄言朝政下獄彭詔辭疾不判免
遷石城所吏目總督秦紘重之特遣督監年二
十六卒

楊

廉字方震豐城人成化十四年進士由庶吉

士拜給事中累陞禮部侍郎晉尚書卒謚文恪

羅

倫字彝正永豐人成化二年進士第一授翰

林修撰時起復大學士李公賢公抗疏劾之遂

落職提舉泉州市舶司四年召還原官改南京

翰林院供職十四年卒謚文毅

許進字季升靈寶人成化二年進士除監察御史巡甘肅山東弘治元年以僉都御史巡撫大同九年陞右都御史撫陝西尋以戶部侍郎提督大同軍務正德初爲兵部尚書後改吏部爲劉瑾所惡除籍瑾誅復官致仕卒贈太子太保嘉靖初謚襄毅

韓文字貫道洪洞人成化二年進士爲給事中劾汪直考訊幾死出爲湖廣叅議累官都御史兵部尚書弘治初召爲戶部尚書正德初瑾矯

詔奪公官尋逮詔獄瑾誅復官致仕嘉靖初加太子太保賜詔存問卒贈太傅謚忠定

林俊字待用莆田人成化三年進士起家爲郎建言逮獄尋復官按權璫罪三封還詔書及爲巡撫都御史兩平大寇累官刑部尚書嘉靖初卒贈太子少保謚貞肅

屠勳字元勳平湖人成化五年進士累官至刑部尚書正德十一年卒謚康僖

董越字尚矩寧都人成化五年進士弘治十三

年仕至南京工部尚書卒贈太子少保謚文熙
李傑字世賢常熟人成化二年進士改庶吉士
授編修累官禮部侍郎正德元年改禮部尚書
忤逆瑾意致仕卒

程敏政字克勤休寧人成化二年進士弘治十一
年任詹事尋加禮部右侍郎卒贈禮部尚書

楊璿字叔璣無錫人正統四年進士授戶部主
事歷陞副都御史撫治荆襄改撫北直節制邊
關巡撫河南成化十四年卒賜葬祭

王復字初陽固安人正統七年進士授給事中
陞通政叅議尋陞禮部侍郎使虜迎駕還陞通
政使成化初擢兵部尚書以陝西多故出巡邊
得便宜行事尋改工部尚書致仕卒贈太子太
保謚莊簡

儲懽字靜夫泰州人成化二十年進士由考功
司主事歷陞戶部侍郎逆瑾專政公尋致仕瑾
誅公起南京吏部力辭得允卒謚文懿

謝遷字于喬餘姚人成化十一年進士第一累

陞侍講學士弘治八年入內閣泰陵大漸入受
顧命正德元年致仕尋削籍嘉靖六年春復召
入閣明年乞歸卒年八十贈太傅謚文正

費

宏字

鉛山人成化二年進士第一歷禮

部左右侍郎至尚書正德六年召入內閣九年
致仕嘉靖初起少保入閣累加少師六年致仕
卒贈太保謚文憲

喬

宇字希大樂平人成化十八年進士由知縣

累官至吏部尚書謚莊簡

彭澤字濟物蘭州人弘治三年進士由刑部主事歷陞都御史巡撫遼東總制川廣等處加官保掌本院事後爲民嘉靖初徵爲兵部尚書加少保致仕

王憲字維綱東平人弘治三年進士授知縣入爲御史歷陞右都御史巡撫遼東後撫鄖陽大同陞兵部侍郎尋晉尚書嘉靖六年以原官兼左都總制三邊累請乞休復起兵部尚書卒追贈少保謚康毅

李承勛字立卿嘉魚人弘治六年進士初知太湖縣歷陞副都御史巡撫遼東正德末請告嘉靖中起吏部尚書尋改刑部疏論時事改兵部尚書兼都御史提督團營八年爲本兵十年卒贈少保謚康惠

柴昇字公照內鄉人成化二十三年進士擢給事中正德二年陞副都御史巡撫江西又改陝西歷任都御史兵工二部尚書尋歸嘉靖元年年八十遣官存問二年卒贈太子少保

叢 蘭字廷秀文登人弘治三年進士累官南京工部尚書嘉靖二年卒贈太子少保

王 瓊字德華太原人成化二十年進士由工部主事歷陞戶兵吏三部尚書加少師正德十六年下獄謫戍綏德嘉靖六年起兵部尚書提督陝西軍務尋改吏部卒

梁 儲字叔厚順德人成化十四年進士由庶吉士歷陞吏部尚書兼學士爲逆瑾所惡改南五年召入內閣十六年累加少師致仕嘉靖時卒

贈太師謚文康

楊一清字應寧丹徒人八歲爲奇童薦入翰林秀才成化八年進士授中書舍人十五年歷陞副都御史督理茶馬盪政十八年經略邊務正德元年改總制三邊二年爲瑾所忌引疾歸五年起公討賊寧夏授策張永竟誅瑾十年入內閣尋歸嘉靖四年起公兵部尚書兼憲職提督軍務未幾召入內閣尋加少師兼文華殿大學士歸八年削籍九年卒得復官二十七年贈太保

謚文襄

王 鏊字濟之吳人成化十一年進士初授翰林
編修累陞吏部侍郎兼學士正德元年召入內
閣四年四月致仕卒贈太傅謚文恪

楊廷和字介夫新都人成化十四年進士用翰林
累陞少詹學士正德二年召入內閣十一年憂
去服闋復爲內閣迎立 世廟封伯爵不受一
品考績進太傅力諍大禮去削籍隆慶時贈官
謚文忠

姜 洪字希範廣德州人成化十四年進士官至
巡撫山西右副都御史正德七年卒

范 珠富順人成化十一年進士

朱應登字升之寶應人弘治十二年進士爲南京
戶部主事歷陞叅政卒號凌谿先生特顧華玉
璘劉元瑞麟徐昌穀禎卿與公爲江東四才

蔣 冕字敬之全州人成化二年進士由庶吉士
授編修歷陞禮部尚書正德十二年入內閣進
少傅嘉靖初封伯固辭議禮不合免歸隆慶中

皇明經世編

姓氏爵里

美

平露堂

謚文定

羅 玘 字景鳴建昌人成化二十三年進士改庶

吉士弘治二年授編修累陞吏部左侍郎正德
七年致仕世稱圭峯先生卒贈禮部尚書謚文

肅

何孟春字子元弘治六年進士郴州人由庶吉士

授兵部職方郎歷陞右都御史巡撫雲南尋遷南吏部侍郎卒所著有餘冬錄序間日分義撫
滇條約隆慶中贈禮部尚書謚文簡

張
文字京載新喻人弘治六年進士官戶科都
給事中

顧
清字士廉華亭人弘治六年進士由庶吉士
累陞禮部右侍郎尋陞尚書致仕謚文僖

毛
紀字維之掖縣人成化二十三年進士由庶

吉士歷陞吏部侍郎正德十二年入內閣累加
禮部尚書加少保嘉靖三年致仕年八十三卒

贈太保謚文簡

王守仁字伯安餘姚人弘治十二年進士抗疏乞

誅逆瑾謫龍場驛丞瑾誅歷陞僉都御史巡撫
南贛宸濠反公討平之詔錄公功封新建伯兼
南京兵部尚書叅贊機務尋提督兩廣卒贈侯
隆慶中謚文成

胡世寧字永清仁和人弘治六年進士由推官歷

陞江西按察使備兵東鄉抗疏劾袁濠下錦衣
獄尋謫戍潞陽嘉靖初擢僉都御史巡撫四川
未幾召爲兵部侍郎尋轉兵部尚書加太子太
保九年卒贈少保謚端敏

許讚字廷美靈寶人弘治九年進士授大明推
官召爲監察御史正德二年以父進冢宰改編
修逆瑾惡公出爲知縣歷陞至戶部尚書去任
嘉靖十五年起吏部尚書加少保二十三年入
內閣二十五年以致仕懇辭削籍尋卒復公官

仍贈少師謚文簡

李夢陽字獻吉慶陽人弘治六年進士授戶部主事嘗監三關被構下獄尋得釋十八年應詔陳言下獄正德改元爲韓文草疏請誅八閩降布政司經歷三年以他事械赴京尋釋瑾敗起爲提學副使落職閑住嘉靖八年卒後謚景文

何景明字仲默信陽人弘治十五年進士授中書舍人尋提學關中未幾卒年三十九公八歲能賦詩十五舉于鄉十九登進士與李獻吉齊名

憂憤時事尚節義鄙榮利並有國士之風

康海字德涵武功人弘治十五年進士第一人

授修撰言官以鄉里指爲瑾黨罷歸卒

王九思字敬夫鄆縣人弘治九年進士授簡討九年考滿調吏部尋謫壽州同知正德六年致仕
卒年八十四所著有漢陂正續集碧山續稿新稿行于世

劉玉字咸栗萬安人弘治九年進士自縣令召爲御史疏論閹瑾下獄瑾誅起副使歷陞南僉

都提督江防嘉靖初以平濠功陞刑部侍郎尋
以事下獄罷歸卒于家隆慶初詔贈刑部尚書
謚端毅

汪 循字善甫婺源人弘治 年進士官至順天

府判

劉 龍字舜卿襄垣人弘治十二年進士授編修
正德初改兵部郎尋擢吏部瑾誅復翰林嘉靖
初歷陞禮部侍郎六年陞南吏部尚書又改南
兵部叅贊機務尋致仕三十二年卒明年贈太

子太保謚文安

石 瑤字邦彥藁城人成化二十三年進士由庶
吉士累陞禮部尚書嘉靖四年入內閣閣臣忌
之欲削公權令兼學士專管制勅六年致仕卒
初贈少保謚文隱嘉靖閣臣之廉貧亡踰公者
後改謚文介

劉 麟字元瑞安仁人弘治九年進士除刑部主
事以忤逆瑾除名瑾敗遷按察使嘉靖元年擢
副都御史撫真定累遷工部尚書以諫織造忤

三才圖會
卷之十
女上
三
旨致仕後以獻陵官殿雨漏追論落職卒年八
十三贈工部尚書謚清惠

何 瑋字粹夫武陟人弘治十五年進士由庶吉
士累官至右都御史嘉靖二十九年卒贈禮部

尚書謚文定

方良永字壽卿莆田人弘治三年進士由戶部主
事正德時歷陞山東布政嘉靖初擢都御史撫
治鄖陽尋致仕六年起應天巡撫未任卒賜謚

簡肅

孫懋字德夫正德六年進士知蒲城縣召爲給事中疏劾江彬諫止巡幸陞按察使以詰中校下詔獄貶典史累陞應天府尹致仕嘉靖三十年卒贈右都御史

周用字行之吳江人弘治十五年進士由行人改給事中歷陞藩臬嘉靖初擢副都御史尋陞工部尚書總督河道嘉靖二十五年陞吏部尚書明年卒謚恭肅

張邦奇字常甫鄞縣人弘治八年進士由庶吉士

累陞南京吏部尚書已改兵部參贊機務嘉靖二十三年卒謚文定

王廷相字子衡儀封人弘治十五年進士由庶吉士授給事中正德中謫州判稍遷知縣復召爲御史爲內臣所構下獄謫縣丞遷知縣嘉靖初歷陞右都御史巡撫四川入爲兵部尚書免歸卒隆慶初復其官贈少保謚肅敏

鄭善夫字繼之閩縣人弘治十八年進士爲戶部主事逆瑾用事謝政歸家居數年嘉靖改元起吏部郎病卒

萬鏜字仕鳴進賢人弘治十八年進士任刑部

主事調吏部陞南京都御史嘉靖初年以言事

免官歸會湖廣貴州苗叛起公勦撫之擢南京

刑部尚書考滿歸嘉靖四十四年卒年八十一

董玘字文玉會稽人弘治十八年進士第二授

編修爲劉瑾所忌出爲知州遷刑部郎調吏部

瑾誅還官翰林累陞吏部左侍郎兼學士尋落

職卒隆慶初贈禮部尚書謚文簡

魏校字子林崑山人弘治十八年進士正德元

年授刑部主事轉兵部歷陞太常卿卒謚恭簡

崔銑字子鍾一字仲鳧安陽人弘治十八年進

士由翰林院庶吉士累陞侍讀學士嘉靖元年

陞祭酒未幾擢南京禮部侍郎卒贈尚書謚文

敏

夏良勝字于中建德人正德三年進士起家刑部

主事調吏部諫南巡下獄嘉靖初復其官歷陞

太常寺卿降知州八年以議禮繫獄謫戍遼陽

卒于衛

陸深字子淵上海人弘治十八年進士選庶吉士授編修忤逆瑾改南禮部主事瑾誅復編修嘉靖初爲經筵講官言事謫延平同知尋督學浙江歷陞太常寺卿兼侍讀學士駕幸承天以公掌行在院印改正詹事二十年致仕卒贈禮部侍郎謚文裕

黃綰字宗賢黃巖人承祖文毅公廕授後軍都事大禮議起公具疏與焉自工部郎歷陞禮部侍郎奉勅撫大同尋知貢舉陞禮部尚書充安

南正使罷歸卒所著有石龍集石龍奏議思古
堂筆記等書行于世

劉天和字養和麻城人正德三年進士由

歷陞僉都御史督理甘肅屯政尋撫陝西累陞
兵部侍郎加左都御史總理三邊軍務嘉靖十
六年陞尚書二十四年卒贈少保謚莊襄

毛伯溫字汝厲吉水人正德三年進士由推官掣
御史歷陞巡撫山西尋改順天嘉靖十六年陞
兵部尚書十八年總理三關軍務尋加太子少

保平安南晉光祿大夫二十三年爲民

韓邦奇字

朝邑人正德三年進士授吏部主

事歷陞南京右都御史尋進兵部尚書嘉靖三
十六年卒贈太子少保謚恭簡

余

珊字

桐城人正德三年進士

林希元字茂貞福建人正德十二年進士授大理

寺評事嘉靖初條上新政切中時弊尋謫泗州
判官竟以抗節不屈當路棄官歸凡三年以薦
累遷大理寺丞尋以言事落職知欽州累陞兵

備僉事世稱次厓先生

史道字克弘涿郡人正德十二年進士選庶吉

士授給事中疏劾江彬救王瓊之死嘉靖初下
獄尋起備兵潁川歷陞都御史十五年巡撫大
同陞兵部尚書加太子少保三十六年卒

謝汝儀字國正鄞縣人正德九年進士授餘干令
擢御史累陞至按察司使卒所著有果菴集

馬卿字敬臣林慮人弘治十八年進士選庶吉

士正德二年授給事中出爲大名知府歷任布

政使嘉靖二年謫爲知府累陞副都御史總理漕運卒于官

舒芬字國裳浙江人正德十二年進士第一授修撰會疏諫南巡廷杖幾斃謫福建市舶提舉嘉靖二年復官翰林議禮執不當考獻帝之說杖如前尋丁艱歸卒

楊慎字用修成都人正德六年進士第一授修撰嘉靖初爲經筵講官尋以議禮跪門哭諫下獄廷杖謫戍雲南永昌衛卒以隆慶元年贈光

祿寺少卿

汪文盛字希周崇陽人正德六年進士爲推官入
爲兵部主事武廟南征公疏諫械杖于廷嘉靖
初擢爲車駕郎中歷陞至按察使尋以莫登庸
竊據擢公僉都御史保釐南詔陟爲大理寺卿
章 僑字處仁蘭谿人正德十二年進士授行人
嘉靖初選給事中遇事盡言八年出爲衡州知
府累陞福建布政使卒

徐 問字用中武進人弘治十五年進士除廣平

推官歷陞布政尋以副都御史巡撫貴州歷少
司馬晉戶部尚書致仕卒贈太子少保謚莊裕

秦 金字國聲無錫人弘治六年進士由戶部主

事歷陞副都御史巡撫湖廣嘉靖二年爲戶部
尚書六年引疾十年復起爲南戶兵二部尚書
尋致仕三十三年卒謚端敏

王以旂字士招江陵人正德六年進士授知縣擢
御史累陞右都御史掌南院嘉靖二十六年召
爲工部尚書尋轉左都御史明年爲兵部尚書

代曾銑爲陝西總督卒贈少保謚襄敏

蔣

曙字

全州人弘治九年進士嘉靖五年

以工部侍郎兼僉都御史採木六年卒于官

王邦瑞

字惟賢宜陽人正德十二年進士選庶吉

士改授知州歷陞僉都御史巡撫寧夏嘉靖庚

戌陞本兵尋奪職歸三十九年起戎政尚書明

年卒贈太子少保謚襄毅

張孚敬

初名聰字秉用永嘉人正德十五年進士

嘉靖三年以議禮陞兵部侍郎六年以禮部尚

書召入內閣八年致仕至天津召還十年以雷震致仕十一年召還又致仕十三年召還加少師十四年病乞休尋卒贈太師謚文忠

桂

萼字

安仁人正德六年進士由知縣遷

刑部主事議禮稱旨累陞禮部尚書嘉靖八年入內閣加少保十年致仕卒贈太傅謚文襄

方獻夫字叔賢南海人弘治十八年進士由廣吉

士改禮部郎歷陞吏部尚書嘉靖十一年召入內閣十三年晉少保致仕尋卒贈太保謚文襄

席 書字文同遂寧人弘治三年進士由知縣正
德中歷陞布政嘉靖元年以副都御史巡撫湖
廣尋改南兵部侍郎以議禮稱旨陞禮部尚書
六年加武英殿大學士三日卒贈太傅謚文襄
王 軌江都人開平衛籍弘治十二年進士嘉靖
十五年累陞南京兵部尚書十八年致仕卒

霍 韜字渭先南海人正德八年進士未娶引例
告歸嘉靖元年起爲職方主事尋以議禮遷少
詹兼侍講學士累陞至禮部尚書十九年卒贈

太子太保謚文敏

唐

龍字虞佐蘭谿人正德三年進士由知縣歷

陞太僕寺卿尋擢僉都御史總督漕運尋陞兵部尚書總制三遷嘉靖二十五年改吏部奪職卒贈少保謚文襄

毛

憲字式之武進人正德六年進士擢給事中

嘉靖十二年卒

汪應軫字子宿山陰人正德十二年進士改庶吉

士與舒芬等上疏諫南巡跪門廷杖尋出知泗

州嘉靖登極召爲給事中與張桂不合出爲江
西提學僉事尋卒學者私讞爲清憲先生

張岳字惟喬泉州人正德十二年進士授行人
諫南巡下獄杖闕下幾死嘉靖初起原官歷任
鄖陽江西兩廣撫臣陞右都掌院事尋以楚苗
猖獗出公總督三省底寧分宜忌公降兵部侍
郎卒復其官贈太子少保謚襄惠

鄭自璧字采東祥符人正德十二年進士十四年
由庶吉士授給事中嘉靖三年陞兵科都諫遇

事敢言六年降江陰縣丞

張 袞字時華江陰人正德十六年進士改庶吉士授御史已復改編修累陞國子祭酒尋以光祿寺卿致仕嘉靖四十三年卒

張 珩字 石州人正德十六年進士授御史陞僉都御史巡撫延綏已巡撫寧夏總督陝西三邊嘉靖二十五年進戶部尚書尋謫戍慶陽已復起副都御史巡撫延綏遷兵部侍郎卒

楊 選字 章丘人正德十六年進士三十七

年以僉都兩撫大同陞兵部侍郎尋下詔獄卒

潘 潢字 婺源人正德十六年進士由知縣

擢戶部主事歷陞戶部尚書尋改南京兵部尚書嘉靖三十四年卒贈太子少保謚簡肅

馮 恩字子仁華亭人嘉靖二年進士以行人擢南臺御史十一年因彗星見疏斥都御史汪鋈詔下獄以子行可請闕乞代死免死戍雷州隆慶初卽其家拜大理寺丞致仕卒

鄒守愚字君哲莆田人嘉靖五年進士由戶部主

事歷陞僉都御史巡撫河南晉戶部侍郎三十四年奉命秩祀河嶽卒于秦贈都御史謚襄惠

夏言字公謹貴溪人正德十二年進士由行人

擢兵科給事中以議禮稱旨進翰林侍讀學士

嘉靖十五年入內閣累加少師二十年削免尋

復職二十一年又革職二十四年復任二十七

年降尚書致仕十二月論斬隆慶中謚文愍

何良俊字元朗華亭人少與弟良傅負俊才人以

二陸比之嘉靖時貢入太學授南京翰林院孔

目所著有柘湖集

朱 純字子純長洲人正德十六年進士由知縣

陞職方郎調吏部累任至副都御史巡撫南贛
嘉靖二十六年改撫浙江兼福建海道有禦賊
功以海禁嚴爲閩人所搆革職聽勘發憤卒所
著有覽餘集

許相卿字 海寧人正德十二年進士告歸十

六年授給事中嘉靖改元抗疏論政令不當者
數事三年免歸屢詔不起尋卒

鄭一鵬字九萬莆田人正德十六年進士選庶吉士授給事中嘉靖三年伏闕請正大禮廷杖然志操益勵先後論劾凡十餘疏六年以言事復廷杖削籍卒隆慶初贈光祿寺卿

韋商臣字希尹長興人嘉靖二年進士由御史累陞四川叅議尋以考察罷

呂光洵字信卿新昌人嘉靖十一年進士由知縣入爲御史言九邊事凡十餘奏尋擢副都御史督餉南畿四十二年巡撫雲南晉南京工部尚

書歸卒

龔 輝字實卿餘姚人嘉靖二年進士授工部主事奉勅採木屢疏請停免得旨允其奏累陞布政使二十三年擢副都御史提督南贛軍務二十九年陞工部侍郎致仕卒所著有西槎疏草全陝政要諸書

袁 袞字永之吳人嘉靖五年進士選庶吉士授兵部武選主事爲胡端敏公所重以失火下獄謫戍湖州尋赦歸累陞廣西提學卒

蘇 祐字允吉濮縣人嘉靖五年進士授縣令徵

爲御史出按宣大監軍討平亂卒尋陞僉都御史巡撫保定移撫山西二十八年以兵部左侍郎總督宣大邊務凡十年進兵部尚書分宜忌公削籍爲民萬曆元年復官致仕卒所著有三關紀要迨游瑣言奏議等書

鄭 曉字窒甫海鹽人嘉靖二年進士授職方主事著九邊圖誌議禮下獄被杖尋遷吏部分宜忌之詔貶和州判官後累陞右都御史協理戎

皇明經世編

姓氏爵里

望

平露堂

政掌部事楊襄毅宣大還公遷刑部尚書以言
官論列削籍卒復官隆慶初賜祭葬贈太子少
保謚端簡

嚴 嵩字惟中分宜人正德 年進士由庶吉

士歷陞吏部尚書嘉靖二十一年入內閣二十
九年夏言以罪去獨爲首相攻者數起卒不去
至四十一年始致仕尋以子世蕃貪縱棄市削
其恩廕并籍其家嵩死時寄食墓舍不能具棺
槨亦無弔者年八十六

李默字時言歐寧人正德十六年進士授庶吉士改戶部主事改吏部尋謫寧國判歷陞吏部侍郎尋進尚書分宜與趙文華忌公疏公謗訕下獄卒隆慶初詔復官遣官諭祭營葬如例

程文德字

永康人嘉靖八年進士由編修以

論汪鉉下獄謫典史歷陞吏部侍郎尋加學士掌詹事府事管撰玄文不稱旨調南吏部尋削籍卒後復其官仍贈禮部尚書謚文恭

聶

豹字文蔚永豐人正德十一年進士由華亭

知縣歷陞僉都御史巡撫順天嘉靖三十一年陞兵部尚書尋致仕卒隆慶元年贈少保謚貞襄

翁萬達字仁夫揭陽人嘉靖五年進士由戶部主事歷陞梧州知府尋擢征南副使以軍功陞一級二十三年擢副都御史巡撫陝西修築邊牆議復河套尋以破虜陞兵部尚書丁艱起復以疏中字誤訛爲民尋詔復公兵部尚書而公卒矣隆慶年謚襄敏

錢 琦字公良海鹽人正德三年進士起家部郎

力諫南巡仕至太守卒所著東畬集

王學夔字一臣安福人正德九年進士初任刑部

主事調考功郎諫南巡跪門五日廷杖幾死嘉

靖初陞太僕卿尋陞副都御史撫治郎陽累晉

南京兵部尚書隆萬間兩膺存問卒年九十四

謚莊簡

毛鳳韶字瑞成麻城人正德十五年進士爲御史

有直聲尋謫嘉定州判官終雲南僉事有聚峯

文集藏于家

陳時明字際豐堂邑人正德十六年進士嘉靖元年授給事中六年陞左叅議尋致仕卒

曾 忭字汝誠泰和人嘉靖五年進士授知縣選

給事中尋掌兵垣十四年爲民穆廟登極復職
仍晉階致仕

楊爵字伯修富平人嘉靖八年進士授行人改
御史上封事兩繫詔獄凡八年釋歸爲民卒隆
慶元年追贈光祿寺卿謚忠介

楊名字實卿遂寧人嘉靖八年進士一甲授編
修建言爲民

許論字廷議靈寶人嘉靖五年進士由推官爲
兵部主事上九邊圖說歷陞參都御史巡撫薊

州尋陞兵部侍郎總督宣大諸軍三十五年詔
進本兵加太子太保尋復總宣大軍務四十四
年卒謚恭襄

侯 綸字

太原人正德六年進士歷陞兵部

侍郎嘉靖二十六年起戶部侍郎總督糧儲二
十九年致仕卒

張秉壺字國鎮莆田人嘉靖十七年進士二十二
年由知縣拜給事中三十年陞尚寶司卿改太
僕三十五年免官卒

趙 仲字 掖縣人正德九年進士仕至僉都

御史

黃 佐字 香山人正德十五年進士累官副

御史總督兩廣軍務

王朝用字 南充人正德十五年進士嘉靖十

五年時爲兩淮巡鹽御史

屠應竣字文升平湖人文僖子也嘉靖五年進士

由庶吉士授刑部主事尋復官翰林晉諭德解

職歸卒所著有蘭暉堂集

孫 陞字志高餘姚人忠烈子也嘉靖十四年進士由庶吉士累陞禮部侍郎尋晉尚書卒謚文恪

曾 銑字 黃巖人嘉靖八年進士由知縣爲

御史巡按遼東會兵變公捕首惡誅之遂大定因不次見擢比總督陝西時首倡復套議大學士言力持其議分宜授旨仇鸞遂以結交近侍律論死隆慶初事白贈尚書謚襄愍萬曆中詔建祠以祀之云

姚 涑字惟東慈谿人嘉靖二年進士第一授修

撰議禮被杖尋復官累陞侍讀學士卒作有邊
圖海運策

張 治字文邦茶陵人嘉靖二年進士爲庶吉士

授編修二十七年累陞至南京吏部尚書明年
入內閣未幾卒贈少保謚文隱隆慶初改文毅

張時徹字惟靜四明人嘉靖二年進士初授禮部

主事歷任藩司以副都御史巡撫四川改江西
三十四年累陞南京兵部尚書尋致仕歸卒

徐

階字子升華亭人嘉靖二年進士授編修以議孔子像出爲延平推官歷陞副使尋以太子出閣召拜洗馬累遷至禮部尚書三十一年召入內閣嵩去公爲首揆凡七年隆慶二年致仕卒贈太師謚文貞

胡

松字汝茂涇州人嘉靖八年進士由知州歷陞副都御史巡撫江西陞南京兵部尚書尋改吏部嘉靖四十五年卒于位贈太子少保謚莊

肅

魏煥字原德長沙人嘉靖八年進士兵部職方

郎擢四川僉事所著有續九邊圖考

王邦直字東溟卽墨人由明經嘉靖中爲益山丞
上書條奏十事優旨褒答後精研律呂著樂書
正聲四十卷人比之韓洛苑云

趙炳然字 劔州人嘉靖八年進士授御史歷

陞都御史巡撫湖廣浙江晉兵部尚書出總宣

大山西邊務尋回掌部事隆慶三年卒贈太子

太保謚恭襄

趙貞吉字孟靜內江人嘉靖十一年進士選庶吉
士庚戌虜薄都城公以論德兼御史領勅宣諭
督戰尋下獄被杖謫荔波典史累陞戶部侍郎
爲相嵩所忌奪其官隆慶改元起公官三年召
入內閣仍兼都察院左都四年歸卒贈少保謚
文肅

茅坤字順甫歸安人嘉靖五年進士爲縣令入
爲司勳累陞至大名備兵副使尋奪官世稱鹿
門先生

田汝成字叔禾錢塘人嘉靖五年進士累官提學副使

趙時春字景仁平涼人嘉靖五年進士改庶吉士授戶部主事數上疏言事下獄爲民暨改編修兼司經局校書疏請正東官以崇國本又罷爲民尋以薦爲職方郎歷陞都御史巡撫山西提督鴈門關尋解官聽調卒

唐順之字應德武進人嘉靖八年進士授兵部主事轉吏部尋以科道部屬成選入翰林公遂與

馮尋爲右司諫以言事爲民薦起職方郎奉勅
經略浙江倭寇陞僉都巡撫仍管前事三十九
年卒

王維楨字允寧華州人嘉靖十四年進士選庶吉
士授檢討累陞國子祭酒三十四年關中地震
人民壓死者過半公亦不免焉

王燁字孟韜金壇人嘉靖十四年進士爲吉安
推官擢給事中數言事皆剴切論分宜遷僉事
尋落職卒有楞菴集行世

胡宗憲字

績溪人嘉靖十七年進士爲縣令

擢御史巡按湖廣尋以倭警拜僉都御史總督
浙直江福軍務屢戰奏捷卒以計殲渠魁倭寇
悉平晉少保兼太子太保兵部尚書以人言落
職械至京師卒于獄天下惜之已復官萬曆十
七年時予祭葬

阮鶚字

桐城人嘉靖二十三年進士授刑

部主事改御史歷陞僉都御史巡撫浙江與總
督胡定計擒斬徐海等尋移鎮閩坐糜費被逮

落職尋卒

任 環字應乾潞安人嘉靖二十三年進士由知縣尋爲蘄州同知三十二年值倭寇東南公獨訓練民兵與力戰屢捷擢按察司僉事備兵蘇松尋以公加副使廕一子千戶世襲陞叅政丁憂歸卒後贈光祿寺卿

唐 樞字 歸安人嘉靖五年爲刑部主事以問李福達獄革職爲民條陳禦倭之策最爲詳核所著有木鐘臺集

鄭若曾字

人嘉靖倭寇浙直時都御史

曹邦輔辟爲記室叅軍後胡宗憲亦雅重之凡
誓師與紀功之言皆其筆也

王慎中字道思晉江人嘉靖十四年進士由禮部
主事爲山東學憲有文名其文與唐荆川專宗
宋人世所謂晉江毘陵者是也

歐陽鐸字崇道泰和人嘉靖年進士由行人

歷陞南院副都御史尋撫應天定田賦之法凡數十百條遷少宰未幾乞休歸卒贈工部尚書

謚恭簡

徐獻忠字伯臣華亭人嘉靖初鄉舉爲奉化令歸

卒

章煥字吳縣人嘉靖十七年進士三十四

年累陞光祿寺卿三十八年以副都御史專督

漕運明年坐事下獄謫戍

楊博字惟約蒲州人嘉靖八年進士由知縣陞職方郎超拜僉都御史巡撫甘肅歷陞兵部尚書尋改吏部隆慶二年請告四年起冢宰行兵部事萬曆初晉少師兼太子太師尋致仕卒贈太傅謚襄毅

葛守禮字與立德平人嘉靖八年進士授推官擢兵部主事二十七年以副都御史巡撫河南尋總督宣大歷陞左都掌院事致仕歸卒贈太子太保謚端肅

袁 煒字懋中慈谿人嘉靖二十六年進士授編
修歷陞禮部尚書四十一年召入內閣累加少
傅四十四年卒謚文榮

馮 璋字 慈谿人嘉靖十七年進士

李春芳字子實興化人嘉靖二十六年進士第一
累官禮部尚書四十四年入內閣穆宗初爲首
輔尋致仕卒贈太師謚文定

嚴 訥字敏卿常熟人嘉靖二十年進士選庶吉
士累陞禮部尚書無何彖宰缺上手詔用公四

十四年召入內閣尋致仕卒贈少保謚文靖

聞人詮字

餘姚人嘉靖十五年進士

屠仲律字

平湖人嘉靖二十九年進士

王忬字民應太倉州人嘉靖二十年進士授行

人選御史按順天值庚戌之變公守通州擢僉

都御史巡撫浙江三十三年移撫大同已移節

鎮薊遼進右都御史尋下獄死隆慶改元子世

貞白寃狀詔復原職贈兵部尚書

蕭端蒙字日啓潮州人嘉靖二十年進士授庶吉

士改御史按貴州疏設撫臣增試三十三年復命卒

江東字朝城人嘉靖八年進士用戶部主

事歷陞副都御史巡撫遼東尋總督三邊陞兵部侍郎協理戎政兼督宣大薊遼等六鎮嘉靖四十四年卒贈少保謚恭襄

王之誥字石首人嘉靖二十三年進士累官

僉都御史巡撫遼東四十五年陞兵部侍郎總督宣大以軍功加右都御史隆慶元年回籍五

年爲南京兵部尚書萬曆元年改刑部尋終養
歸十七年卒

薛應旂字

武進大嘉靖十四年進士累官提

學副使

陸

粲字浚明長洲人嘉靖三十五年進士選庶

吉士授給事中尋以論廠衛劾張桂凡兩下獄
謫都勻驛丞遷永新知縣尋致仕歸

陸樹聲字與吉華亭人嘉靖二十年進士選庶吉

士嘉靖四十五年累陞至吏部侍郎屢疏乞休

萬曆元年陞禮部尚書尋致仕歸卒年九十七
贈太子太保謚文定公清風高節海內所仰重
者五十餘年子司寇名彥章者能先世其家聲
云

陸樹德字與成華亭人文定弟也嘉靖三十六年
進士由推官拜刑部主事尋改給事中累陞僉
都御史巡撫山東卒

張翀字子儀柳州人嘉靖三十二年進士授刑
部主事上疏劾嚴嵩父子奸狀下詔獄成都勻

隆慶初召補吏部尋陞僉都御史巡撫南贛四年巡撫湖廣萬曆二年起總督漕運入爲刑部侍郎卒

楊繼盛字仲芳保定人嘉靖二十六年進士授南吏部主事三十年遷兵部郎疏斥馬市被逮貶狄道典史陞知縣遷戶部郎又遷刑部郎尋調兵部武選三十二年論嚴嵩十罪五奸詔下獄杖一百在獄三年竟死西市萬曆元年贈太常寺少卿謚忠愍

沈

鍊字純甫麗水人嘉靖十七年進士爲縣令

遷錦衣衛經歷疏劾嚴嵩謫戍保安尋爲楊順
路楷所構殺隆慶初得白贈公光祿寺卿并補
順楷下獄抵罪

王宗茂字時育京山人嘉靖二十六年進士授行

人尋拜御史疏劾嚴嵩八大罪謫平陽縣丞尋
卒隆慶初贈光祿寺卿

朱

衡字士南萬安人嘉靖十一年進士由知縣

擢刑部主事歷陞副都御史巡撫山東召爲工

部侍郎四十一年改吏部四十三年擢工部尚書總理河漕尋召還萬曆二年致仕卒

翁大立字元本餘姚人嘉靖十七年進士累陞工部侍郎隆慶五年改兵部萬曆初爲南京工部尚書尋改兵部致仕

馬森字懷寧人嘉靖十四年進士初爲戶

部主事榷稅九江出爲郡守遷副使歷陞戶部尚書萬曆八年卒賜祭葬如例

靳學顏字濟寧人嘉靖十四年進士由推官

三才圖會卷之十
九十五
三
累官至左布政入爲太僕卿以副都御史巡撫山西進吏部侍郎卒

張瀚字子文錢塘人嘉靖十四年進士由工部主事歷陞副都御史巡撫陝西隆慶末陞南工部尚書萬曆元年改吏部五年忤江陵致仕二十一年卒謚恭懿

高拱字肅卿新鄭人嘉靖二十年進士選庶吉士授編修穆宗爲裕王公爲講官累遷至禮部尚書隆慶元年召入內閣加少傅尋養病歸二

年復以原官起掌吏部與江陵協策封欵俺答後無邊患者五十年隆慶六年罷歸卒謚文襄

殷士儋字正甫歷城人嘉靖二十六年進士選庶

吉士授檢討隆慶二年累陞至禮部尚書兼詹

事四年召入內閣五年致仕卒贈太保謚文通

劉燾字丕冒天津人嘉靖十七年進士起家部

郎四十二年陞僉都御史總督薊遼尋以軍功

加右都總督兩廣隆慶二年晉兵部侍郎四年

陞左都御史提督神樞營未任卒

海 瑞字汝賢瓊山人嘉靖時以鄉舉爲教諭陞

知縣入爲戶部主事上疏下獄隆慶登極時出
公獄還其官累陞僉都御史巡撫應天尋解官
歸萬曆初起都御史掌南院卒于官贈太子少
保謚忠介

陳以勤字逸甫南充人嘉靖二十年進士爲庶吉
士三十一年爲裕邸講讀官歷陞詹翰隆慶元
年召入內閣累加少傅四年致仕卒贈太保謚
文端

高儀字子象錢塘人嘉靖二十年進士選庶吉士爲裕邸講官四十五年累陞禮部尚書隆慶五年召入內閣未一年卽致仕正江陵新鄭用事時也

萬士和字思節宜興人嘉靖二十年進士改庶吉士陞禮部主事歷任藩臬擢副都御史督餉南畿萬曆元年陞禮部尚書三年致仕卒贈太子少保謚文恭

林爌字貞卿閩縣人嘉靖二十六年進士瀚之

孫廷機子也選庶吉士授檢討歷官國子祭酒
萬曆五年晉南禮部尚書八年卒

陸 穩字汝成湖州人嘉靖二十三年進士由刑
部主事歷陞布政使四十年擢右都御史提督
南贛軍務以平賊功遷兵部侍郎仍撫其地尋
改南京兵部侍郎罷歸卒

蔡汝楠字子木德清人嘉靖二十三年進士爲行
人累陞副都御史巡撫河南嘉靖四十年爲兵
部侍郎尋改南工部卒于官

王崇古字學甫蒲州人嘉靖二十年進士授刑部主事歷陞都御史巡撫寧夏隆慶初總督三邊改宣大萬曆五年陞兵部尚書未幾歸十六年卒贈太保謚襄毅公在宣大時畫俺答事定封貢縛叛人約屬夷邊患遂息此爲踴絕云

方逢時字行可嘉魚人嘉靖二十年進士由知縣累陞奮都御史巡撫大同總督薊遼把漢之降俺荅之款與有力焉累陞太子太保兵部尚書四十四年卒于卹典祭葬擬謚

譚 綸字子理宜黃人嘉靖二十三年進士初任南庫部會倭薄留都公募壯士禦却之以知兵名凡再奪情勦廣寇殲倭奴歷任督撫陝西兩廣薊遼等處尋陞兵部尚書萬曆五年致仕諱卒謚襄敏

霍 冀字堯封孝義人嘉靖二十三年進士授推官選爲御史尋擢僉都御史出撫寧夏久之晉兵部左侍郎總督陝西四鎮兵務隆慶二年召爲本兵四年開住卒復其官給卹典如例

張居正字時大江陵人嘉靖二十六年進士改庶
吉士授編修隆慶元年以裕邸講臣召入內閣
萬曆初新鄭去位公爲首揆慨然以天下爲己

任輔政數年海內稱其功累加至太師卒贈上
柱國謚文忠尋爲言者追論削奪後論定復官

林 潤字若雨莆田人嘉靖三十五年進士由知

縣擢南臺御史首論鄢懋卿及劾嚴世蕃累陞
副都御史巡撫江南卒

鄒應龍字翼之長安人嘉靖三十五年進士爲御

史巡按江西疏列分宜貪穢上納其言萬曆初累官兵部左侍郎尋以巡撫雲南失事論奪十六年復其官卒賜祭葬如例

李攀龍字于麟歷城人嘉靖二十三年進士授刑部主事出爲順德守擢陝西提學副使無何請予告歸隆慶初用薦起按察使尋以憂歸卒

宗 臣字子相興化人嘉靖二十九年進士爲吏部考功郎外補閩藩學副疾卒

王世貞字元美太倉州人嘉靖二十六年進士除

刑部主事陞青州兵備父大司馬忤爲分宜所
陷公棄官歸隆慶元年誦父冤起補大名尋以
副都御史撫治鄖陽累陞南京刑部尚書卒贈
太子少保

王世懋字敬美世貞弟也嘉靖三十八年進士值
大司馬喪歸隆慶元年拜禮部主事十二年累
陞福建提學副使尋進南京太常卿卒

吳國倫字明卿興國人嘉靖二十九年進士由中
書舍人擢給事中坐與王李交通浮薄外謫

汪道昆

字伯玉歙縣人嘉靖二十六年進士起家

部郎歷陞僉都御史撫治鄖襄隆慶四年改撫湖廣明年爲少司馬尋卒

張佳胤

字肖甫銅梁人嘉靖二十九年進士爲濬

縣令有政聲累陞副都御史巡撫應天移撫宣府入爲兵部侍郎浙江兵變奉旨往鎮四月底定破倭于溫州晉兵部尚書世稱公有文武才三十九年卒擬謚

趙

錦字元朴餘姚人嘉靖二十三年進士由知

縣徵爲南臺御史三十一年疏論分宜下獄廷杖削籍隆慶元年起御史二年巡撫貴州召爲工部侍郎江陵用事公致位十一年爲左都御史十九年爲刑部尚書不赴卒贈太子太保

劉鳳字子威吳人嘉靖年進士授御史

出爲藩臬其文詰屈于騷賦尤長

徐學謨字思重嘉定人嘉靖二十九年進士累官湖廣巡撫萬曆初爲禮部尚書時宗伯久屬詞臣公以外吏入明習典故人皆服之尋卒

吳桂芳號潭石新建人嘉靖二十三年進士授刑

部主事倭寇方訐出公守揚州歷陞左布政擢
鄖陽巡撫尋以兵部侍郎總督兩廣滿三載召
入署部事尋晉工部尚書總督河漕卒于官贈
太子少保

王宗沐字

臨海人嘉靖二十三年進士累官

工部侍郎公管理河漕最爲稱職

戚繼光字元敬登州衛人由指揮使征閩浙倭寇

有功萬曆初總理薊遼加左都督少保江陵復

改鎮嶺南公用兵善節制以已意創障法南北
著大勲其鎮薊門也用南兵勤訓練凡墩臺營
壘之制至今師之時俺答款土蠻寇遼薊門宴
然公是以不得封如遼東李氏矣

萬恭字

南巴人嘉靖二十三年進士歷官

僉都御史巡撫山西尋陞部侍郎

塗澤民字

漢州人嘉靖二十三年進士歷仕

福建巡撫

何起鳴字來山內江人嘉靖二十九年進士累陞

工部侍郎萬曆十三年以營陵功進尚書十五年致仕辛卯卒贈太子少保

徐陟字子明華亭人文貞弟也嘉靖二十六年進士爲職方郎歷陞刑部侍郎

龐尚鵬字南海人嘉靖三十二年進士爲御史巡按浙江疏易兩役爲條鞭至今便之累陞副都御史巡撫甘肅累加兵部侍郎尋卒

楊成字長洲人嘉靖三十五年進士累官副都御史巡撫江西萬曆八年爲南工部尚書

十年改禮部予告十七年起南兵部尚書叅贊
機務加官保致仕卒謚莊簡

宋儀望字望之永豐人嘉靖二十六年進士爲吳
縣令擢御史未幾超爲大理寺丞尋落職補知
州歷陞至副都御史巡撫江南晉大理寺卿卒

張學顏字子愚肥鄉人嘉靖三十二年進士授知
縣選給事中陞僉事隆慶五年以僉都御史巡
撫遼東萬曆六年陞戶部尚書尋改兵部累加

太子太保

張鹵字召和儀封人嘉靖三十六年進士爲縣

令擢給事中隆慶五年巡撫浙江已移撫保定
陞大理寺卿左遷南太常致仕卒

葉春及字化甫歸善人領嘉靖鄉薦伏闕上書論
時政授惠安令爲權貴所疾中以考功法都御
史艾穆疏薦守興國累遷戶部郎中卒所著有

綱齋集

李邦義字宜之連州人嘉靖三十五年進士授知
縣擢給事中四十五年陞順天府丞歷陞太常

寺卿隆慶三年自陳調南京用尋以疾請歸卒
王得春字茂先安邑人嘉靖三十二年進士授推
官擢給事中四十年降太興縣丞歷陞雲南僉
事隆慶五年罷歸

霍與瑕字子璧南海人尚書韜子也嘉靖三十八
年進士擢御史凡所論列皆有關實政

魏時亮字舜卿南昌人嘉靖三十八年進士授中
書舍人擢給事中隆慶三年陞太僕寺卿四年
免歸萬曆十二年奉旨敘錄起光祿寺卿歷副

都御史晉南刑部尚書

歸有光字熙甫崑山人嘉靖乙丑年進士累官

至太僕寺丞卒

沈思孝字嘉興人嘉靖四十四年進士爲刑

部郎疏論江陵廷杖謫戍萬曆二十三年爲都御史協理戎政尋致仕

吳中行字武進人隆慶辛未五年進士選庶

吉士授編修疏論江陵奪情事廷杖削籍十一年特旨起用歷陞諭德尋乞歸起南掌院不赴

卒賜祭

張四維字子維蒲坂人嘉靖三十二年進士選庶吉士授編修累陞吏部侍郎引疾歸萬曆二年以原官起公三年召入內閣累加少師十一年丁憂十三年卒贈太師謚文毅

陸光祖字與繩平湖人嘉靖二十六年進士由濬縣令爲吏部文選郎歷陞工部侍郎尋告歸江陵沒薦起吏部侍郎尋改南刑部萬曆十九年爲冢宰明年致仕二十五年卒謚莊簡

潘季馴字

烏程人嘉靖二十九年進士累陞

副都御史兼理河道萬曆十二年爲民十九年復起工部尚書提督河道尋致仕

陳有年字登之餘姚人嘉靖四十一年進士授刑

部主事萬曆元年調吏部郎與江陵忤歸十二年以原官起公歷遷僉都御史巡撫江西累陞至吏部尚書卒贈太子太保謚恭介

孫丕揚字

富平人嘉靖二十五年進士授行

人選御史爲僉都御史巡撫保定累陞吏部尚

書萬曆四十二年卒謚

申時行字汝默吳人嘉靖四十一年進士第一授
修撰萬曆元年晉宮庶凡勸講者六年累陞吏
部侍郎召入內閣十二年累加至少師十九年
致仕卒年八十贈太師謚文定

何東序字崇教猗氏人嘉靖三十二年進士除戶
部主事尋司餉遼東擢副使備兵紫荊超拜僉
都御史巡撫榆林禦吉能賓鬼奏捷晉一階丁
憂歸卒所著有九思山房集榆關奏議

姜寶字鳳阿丹陽人嘉靖三十年進士由庶吉士歷陞詹翰萬曆十五年爲南京禮部尚書尋加太子少保致仕

吳時來字維修仙居人嘉靖三十二年進士授松江府推官擢給事中比以言事謫戍馴象所隆慶元年起吏科尋以僉都巡撫廣東調副使未任萬曆十二年起通政遷吏部侍郎累陞左都御史十八年卒于官贈太子少保謚忠恪後以人言追奪

褚 鈇字世威榆次人嘉靖四十三年進士由郎
署萬曆二十一年累陞戶部侍郎兼副都御史
總理糧儲二十三年晉戶部尚書總督漕運尋
致仕卒

溫 純字希文三原人嘉靖四十四年進士授知
縣隆慶二年擢給事中發大璫陳洪奸狀直聲
甚振以失新鄭意出爲叅政隆慶末以原官起
用不數月周歷諸卿與江陵左謝病去江陵劾
擢兵部侍郎巡撫浙江累陞至左都御史加太

子太保卒贈少保諡 公屢拂柄相而卒以

通顯終世稱其有三原之風焉

戚元佐字希仲秀水人嘉靖四十一年進士爲禮

部郎穆廟登極典禮多所匡贊歷陞尚寶司卿

卒

楊俊民初名州民登第改今名字伯章襄毅子也

嘉靖四十一年進士授戶部主事萬曆六年撫

治郎陽移鎮山東尋督理漕河巡撫鳳陽累陞

戶部尚書卒贈少保兼太子太傅

徐元泰字大來宣城人嘉靖四十三年進士累官
右都御史巡撫四川陞兵部右侍郎萬曆二十
一年爲南京兵部尚書

余有丁字丙仲鄞縣人嘉靖四十一年進士授編
修累陞吏部侍郎萬曆十年召入內閣十二年
卒贈太保謚文敏

許國字維禎歙人嘉靖四十三年進士由庶吉
士授檢討累官禮部尚書入內閣十九年以力
請冊立不得旨遂致仕歸卒贈太保謚文穆

王家屏字忠伯大同山陰人隆慶二年進士選庶
士授編修萬曆十二年累陞吏部侍郎召入內
閣十四年憂去服闋復任二十年致仕三十二
年卒贈少保謚文端

王錫爵字元馭太倉人嘉靖四十一年進士授編
修萬曆元年充穆宗實錄總裁累陞禮部侍郎
十二年以尚書召入內閣十九年告假歸省明
年還朝二十二年進少傅致仕卒贈太保謚文

肅

趙用賢字汝師常熟人隆慶五年進士授檢討萬曆五年疏論江陵不奔喪被杖削籍十一年起原官累陞吏部侍郎乞休之疏凡十二上至二十一年歸尋卒謚文毅

徐貞明字伯繼貴溪人隆慶五年進士由知縣擢給事中萬曆三年降太平知事累陞至尚寶司丞十三年陞本司少卿兼河南道御史督理墾田水利言西北水利者莫備于公惜未竟其用

許孚遠字孟中德清人嘉靖四十一年進士授工

部主事調吏部建言謫運判萬曆二年遷南吏部郎久之以僉都巡撫福建歷陞兵部左侍郎三十二年卒贈工部尚書

宋應昌號桐岡仁和人嘉靖四十四年進士由知州歷陞副都御史巡撫山東萬曆二十年倭奴突入朝鮮國王李昫走竄拜公兵部侍郎經略朝鮮得首功尋乞致仕歸爲言官論列削籍三十三年卒詔復其官

鄭 雒字

安肅人嘉靖

年進士累陞

副都御史總督宣大萬曆十一年進兵部尚書
十七年入爲協理戎政二十一年出爲三邊經
略封貢既定歸我叛人修飭邊政誓講諸虜其
功最著三十二年卒贈太保謚襄敏

郭惟賢字希字晉江人萬曆甲戌年進士爲御

史以建言歸尋起僉都御史巡撫湖廣萬曆二

十三年陞副都協理院事乙巳起戶部右侍郎

蕭彥字思學涇縣人隆慶五年進士授杭州推

官擢給事中萬曆十三年陞太常寺少卿尋以

三
日
系
十
第
女
上
頁
三
二
僉都巡撫貴州調雲南十七年撫鄖陽尋總督
兩廣陞戶部侍郎卒于官

張

位字

南昌人隆慶二年進士選庶吉士

累官禮部侍郎萬曆十九年召入內閣二十六
年晉少保尋以人言閑任卒

沈懋孝字晴峯平湖人隆慶二年進士入翰林尋

陞南司業以科場事謫判兩淮遂拂衣歸所著
有長水集

萬象春字仁甫無錫人萬曆五年進士由庶吉士

授給事中十三年陞參政歷陞左布政二十五
年以副都御史巡撫山東尋晉兵部侍郎卒

魏允貞字見臬南樂人萬曆五年進士由推官擢
御史以言事謫外自謫籍陞郎署累官副都御
史爲山西巡撫甚有惠政凡朝廷大事無不盡
言有乃心王室之風惜子廣微附逆敗其家聲
云

趙世卿字南渚歷城人隆慶五年進士授南京兵
部主事上匡時封事語侵江陵陞長史尋以察

去江陵去累陞戶部侍郎三十年晉大司農三十九年去位卒

鍾羽正字叔濂益都人萬曆八年進士十三年由知縣擢給事中十九年陞吏科都給事中疏陳時政晁爲詳切二十年以言事奉旨降雜職尋爲民

王任重字晉江人隆慶二年進士由知縣歷陞行太僕寺卿萬曆二十一年陞雲南叅政

呂坤字叔簡寧陵人萬曆二年進士累官山西

巡撫御史二十一年陞刑部侍郎疏陳織造採木開礦皇店之害并上閏範圍說爲邪臣所疾幾中以危法尋以病歸

沈

鯉字

歸德人嘉靖四十三年進士由庶

吉士累陞官詹萬曆十二年爲禮部尚書十六年致仕三十年上思其忠召入內閣屢以國本爲言凡四年累加少傅致仕歸卒贈 謚文

端

郭子章字青螺泰和人隆慶五年進士累陞都御

史巡撫貴州襲服水西與李襄毅共平播囚功
最著得世蔭

李三才字道甫臨潼人居通州萬曆二年進士仕
至工部尚書漕運總督以上疏劄別邪正削籍
去公恢竒自喜學本縱橫世之君子皆以爲豪
傑焉

李化龍字于田章丘人萬曆十一年進士由縣令
歷陞太僕寺卿尋以僉都御史巡撫遼東屢戰
敗虜晉少司馬楊應龍反擢總督軍務以平播

功進少保子世襲三十二年河決拜工部尚書
總督河道力主開泇漕運賴以濟焉三十七年
陞兵部尚書加少傅四十年卒贈太師謚襄毅
李植字培卿大同人萬曆十一年進士爲御史
有直聲爭大峪壽陵忤政府後至遼東巡撫副
都御史卒

陳于陞字元忠南充人太傅文端子也隆慶二年
進士選庶吉士授編修萬曆二十二年歷陞至
禮部尚書兼翰林學士未幾召入內閣二十四

年卒于官贈太保謚文憲

張養蒙字泰亨澤州人萬曆五年進士由庶吉士授給事中十九年陞太僕寺卿累陞副都御史二十五年因征倭陞戶部侍郎總督運餉于朝鮮二十七年回部三十年卒贈戶部尚書謚毅敏

侯先春字元甫無錫人萬曆八年進士授太常寺博士擢給事中累陞兵科都諫二十九年以言事謫按察司知事歷陞文選主事

許弘綱字少微東陽人萬曆八年進士爲御史有直聲尋以建言削籍後以薦起副都御史爲兩廣總督四十一年以副都署院事尋致仕歸

史孟麟字際明無錫人萬曆十一年進士由庶吉士授給事中二十九年陞太常少卿以憂歸四十二年以原官起用尋致仕

劉應秋字允陽吉水人萬曆十一年進士一甲歷陞國子祭酒二十七年建言謫外光廟登極以東宮舊恩贈禮部侍郎謚文節

曹時聘字

獲鹿人隆慶五年歷部郎累官工

部侍郎總理河道卒與祭葬如例

楊寅秋字時中泰和人萬曆二年進士歷官四川

副使著有平播錄

徐學聚字敬輿蘭谿人萬曆十一年進士授知縣

十七年擢給事中十九年陞僉事累陞布政三

十二年陞右僉都御史巡撫福建尋回籍卒

馮時可字元成華亭人恩子也隆慶五年進士以

職方郎起家歷任藩臬公有文章聲晚而彌勤

沈一貫字

鄞縣人隆慶二年進士選庶吉士

累陞南京禮部尚書萬曆二十年召入內閣爲首揆者凡九年屢爲言者所攻三十四年與歸德同致仕卒謚文恭

朱賡字少欽山陰人隆慶二年進士由庶吉士

授編修十六年累陞禮部尚書二十九年召入內閣四明歸德同日歸遂秉政三十六年奉謚文穆

余繼登字世用交河人萬曆五年進士由庶吉士

累陞禮部侍郎二十七年進本部尚書明年卒
于官謚文恪

張

棟字

崑山人萬曆五年進士投新建令

選給事中尋以國本抗疏削籍爲民卒贈太常
寺卿擬謚

于慎行字無垢一字可遠東阿人隆慶二年進士
選庶吉士授編修累陞禮部尚書三十三年疏
請冊立不報引疾歸三十六年召入內閣未任
卒贈太子太保謚文定

馮

琦字

臨朐人萬曆五年進士選庶吉士

累陞禮部侍郎尋改本部尚書卒謚文敏

薛三才字中孺定海人萬曆十四年進士改庶吉士十六年授給事中陞叅政三十七年以副都御史巡撫宣府四十一年陞右都御史總督薊遼尋卒謚恭敏

王德完字子醇廣安州人萬曆十四年進士改庶吉士十六年授給事中二十八年建言廷杖爲民天啓初起太僕卿陞左副都御史推方爲圓

不滿人望焉尋卒

鄒元標字爾瞻吉水人萬曆五年進士疏劾江陵廷杖謫戍貴州十一年起用擢給事中十二年復以言事調南京刑部照磨十三年陞兵部職方司主事尋歸家居凡三十年天啓中累陞左都御史三年致仕卒謚忠憲

涂宗濬字

南昌人萬曆十一年進士由知縣

拜御史尋爲副都御史巡撫延綏尋總督宣大撫卞失免有功還朝推兵部尚書未任卒

周孔教字懷魯臨川人萬曆庚辰年進士累陞通政司使三十二年以僉都御史巡撫應天三十二年總理河道

梅國禎字克生麻城人萬曆十一年進士爲固安令徵拜御史會時承恩之變公抗疏請爲監軍卒平之俘承恩以獻論功僅遷太僕卿未幾巡撫大同進兵部侍郎督三鎮邊務卒贈右都御史

楊道賓字晉江人萬曆十四年進士第二授

編修遷祭酒三十六年爲禮部侍郎三十七年卒贈禮部尚書謚文恪

郭正域字美命江夏人萬曆十四年進士選庶吉士爲編修累陞禮部侍郎以言事忤政府意妖書事起爲邪人所構幾致不測得罷歸卒謚文毅

唐文獻字元徵華亭人萬曆十四年進士第一拜翰林修撰累陞左庶子充東宮講官與江夏郭美命友善妖書事起公正言相明頗賴以免焉

晉禮部右侍郎卒贈禮部尚書光宗推舊恩晉
太子少保謚文恪公在講席及掌計俱有彊直
聲

董其昌字玄宰華亭人萬曆十七年進士由庶吉
士歷藩臬天啓初推光廟講官舊恩召爲太常
卿仕至禮部尚書掌詹事府卒贈太子太傅公
樂易容物書法爲本朝之冠

焦竑字弱侯日照人居應天萬曆十七年進士
第一授修撰爲日講官坐言事謫外

許維新字周翰山東人萬曆十四年進士由部郎
為松江守有惠政仕至納言天啓初致仕

顧憲成字涇陽無錫人萬曆八年進士授戶部主
事調吏部謫判桂陽州後以舉清廉第一仍還
吏部尋削籍歸講學于龜山先生之道南祠世
所謂東林也後起光祿寺卿不就卒謚端文

孫慎行字武進人萬曆三十五年進士入詞
林歷陞禮部尚書

趙南星字夢白高邑人萬曆二年進士授推官擢

戶部主事尋改吏部癸巳內計澄汰殆盡致削籍林居三十年天啓元年以工部侍郎掌都察院事臺綱肅清尋晉吏部尚書逆賢以公爲黨魁因推山西巡撫事逐之去大禍旣作以八十冢臣戍死代州天下傷焉崇禎時贈太子太保謚忠毅

李廷機字九我晉江人萬曆十一年進士選庶吉士歷陞禮部侍郎三十五年召入內閣爲言者屢攻首尾四年竟未入直致仕歸卒謚文節

葉向高字

福清人萬曆十一年進士選庶吉

士累陞禮部尚書三十七年召入內閣明年山陰卒公遂當國凡五年致仕歸天啓初起爲首揆逆賢擅政公引疾歸卒謚文忠

王象乾字

新城人中隆慶五年進士由知縣

累陞布政巡視北口道節省款賞數十萬尋爲川貴總督加副都御史總督薊遼四十年陞大司馬署冢宰凡二年封印自歸天啓初起總督薊遼撫定插漢予告今上初復召總督宣大

以病歸年九十二卒

陳懿典字

嘉興人萬曆二十年進士選庶百

士累官翰林院學士卒

李維楨字本寧京山人隆慶戊辰年進士爲庶吉

士時有文章聲與婁江新都友善後外歷藩臬

仕至南京禮部尚書

曹于汴字自梁安邑人萬曆二十年進士授推官

三十年擢爲給事中四十年陞太常寺卿累遷

南右都御史天啓四年爲民崇禎改元起左都

尋患病卒

宋一韓字聞遠陳州衛人萬曆二十年進士授推官三十年擢給事中四十年建言降南京大理寺評事四十二年叙兵科功陞俸一級尋卒

邢侗字子愿臨朐人萬曆甲戌年進士累官藩臬善書法世稱邢董云

汪若霖字時甫光州人萬曆二十年進士授行人二十八年選爲給事中三十四年歷陞禮科都給事中是年以建言謫潁州判官尋卒

駱問禮字

武康人萬曆二十六年進士由知

縣授兵部主事三十六年擢爲御史至四十三

年告病歸

余懋衡字平伯婺源人萬曆二十年進士授知縣

擢御史三十九年陞大理寺丞天啓初累陞吏

部尚書四年養病尋削籍

王紀字

芮城人萬曆

年進士授禮部

主事屢疏乞建國本歷陞刑部尚書以輔臣沈

淮諂事客氏公歷陳其奸遂削籍去卒謚莊毅

袁世振字仲建祁州衛人萬曆二十六年進士授
知縣歷陞戶部郎中四十三年陞疏理兩淮鹽
法副使立新舊間撤之法人甚便之尋中考功
法鑄秩去

周之龍字左卿湘潭人萬曆二十九年進士授刑
部主事調工部郎中管理漕運所著有河漕一
規

黃承玄字與叅嘉興人萬曆
年進士歷陞
應天府府尹尋以副都御史巡撫福建卒

朱爕元字

山陰人萬曆十一年進士歷陞四

川布政奢囚之變卽擢巡撫尋爲貴州總督歷
加兵部尚書少師左柱國

熊廷弼字

江夏人萬曆二十六年進士授推

官擢御史按遼策奴酋之必叛屢上疏陳列四
十八年東事起陞大理寺丞兼御史爲宣慰尋
陞兵部侍郎經略遼東天啓元年遼陽陷起兵
部尚書經略廣寧陷與王化貞同入關逮繫論
死廷弼負氣自用然論遼事不可掩雖服國法

論者以爲不死于封疆而死于門戶云

李之藻字我存仁和人萬曆戊戌年進士爲部

郎罷歸東事起以薦累陞太僕寺少卿贊理軍

務後卒于家公曉暢兵法亦精於泰西之學也

徐光啓字子先上海人萬曆三十二年進士選庶

吉士累陞少詹事值遼事起兼御史練兵天啓

中罷歸今上登極起禮部尚書修治曆法尋

召入內閣卒謚文定公博學多聞于律曆河渠

屯田兵法靡不究心獨得泰西之祕其言咸裨

實用云

高攀龍字士鱗無錫人萬曆

年進士任行

人疏侵閣臣降揭陽典史天啓改元起光祿丞
尋超拜左都御史與趙忠毅對掌銓憲首糾大
墨崔呈秀明歲聞逮治命謂大臣義不辱國草
遺表從容赴水死後贈兵部尚書謚忠憲

左光斗字

桐城人萬曆三十五年進士授中

書舍人擢御史慨然以澄清爲任首上移宮停
封疏婦寺切齒之歷陞僉都御史因楊忠烈二

十四大罪之疏既入魏璫并逐公次年被逮榜死今上登極贈太子少保公深沈饒智略數年間力持清議故羣小之恨公甚于忠烈云

楊 漣字大洪應山人萬曆四十一年進士爲常

熟令舉清廉第一選給事中因論醫藥事光廟鑒其忠遂與大臣同受顧命累遷副都御史逆賢禍國列二十四大罪請誅之削籍去次年就逮榜死後贈 謚忠烈

魏大中字孔時嘉善人萬曆四十四年進士授行

人擢給事中力攻奸輔方從哲沈淮爲邪類所嫉逆賢禍起罷歸明年被逮榜死今上初贈太常寺少卿謚忠節

繆昌期字當時江陰人癸丑進士翰林庶吉士以忤璫逮問死詔獄

李應昇字仲達江陰人丙辰進士由推官拜御史以忤璫逮問死詔獄

丘禾嘉字少鶴貴州人由鄉舉歷任遼東巡撫大凌之議與樞輔不合然大凌卒不守云尋陞太

僕寺卿卒

文震孟字文起長洲人天啓二年進士第一拜修撰建言降外逆賢竊政革職爲民今上初起侍讀數上封事論劾長垣及請重定實錄尤爲切要八年入內閣以爭言官事忤旨意罷歸卒

姚希孟字孟長吳縣人萬曆四十七年進士改庶吉士授檢討逆賢竊柄革職爲民今上初起右贊善累陞詹事掌南京翰林院卒公端直沉

凝負公輔之望與文公震孟稱舅甥一時齊名
云

宋懋澄字幼清華亭人中萬曆壬子鄉試閱覽負
奇所著有九箴正續集

黃廷鵠字孟舉青浦人中萬曆己酉鄉試歷任順
天經歷崇禎初年上爲臣不易錄

杜麟徵字仁趾青浦人崇禎辛未進士授刑部主
事調兵部職方司主事卒

陳組綬字伯玉武進人崇禎甲戌進士授兵部職

皇明經世編

姓氏爵里

六六

方司主事卒所纂有職方圖考

姓氏補遺

戈

謙代州人永樂九年進士擢給事中遇事敢

言十八年陞大理寺卿洪熙元年免朝叅未幾陞副都御史馳驛往四川罷伐木之役宣德元年爲民尋卒

李

棠字宗楷縉雲人宣德五年進士由刑部員

外擢侍郎尋巡撫廣西未及三年獲俘賊以萬計朝廷嘉其勳兼提督征蠻軍務事天順中卒

徐廷章字公器羅山人景泰二年進士拜給事中

正門達之罪直聲震中外累陞都御史巡撫寧夏寧夏故無邊牆套虜數入廷章修築之迄今以爲保障

章

懋字德懋金華人成化二年進士入爲庶吉

士諫上元張燈左遷臨武知縣累陞福建僉事尋謝事歸讀書講學凡二十年學者稱楓山先生弘治中起南司業正德初以少宗伯致仕嘉靖初陞南京禮部尚書卒贈太子太保謚文懿

梁

材字大用應天籍大成人弘治十二年進士

由縣令歷陞布政嘉靖六年擢副都御史巡撫
江西尋總督雲貴川廣糧餉晉部尚書劾翊
國公郭勳反爲所中遂落職歸卒隆慶初贈太
子太保謚端肅

李士翱字汝翔長山人嘉靖二年進士拜御史累
陞工部尚書尋改戶部尚書卒

錢薇字懋垣海鹽人嘉靖十一年進士授官行
人選爲給事中公留心邊務論列治體皆歷歷
言之十七年以言事罷爲民卒隆慶元年贈太

常寺少卿著有承啓堂稿國朝名臣事實備邊
策河套議海防略藏于家

康太和字原中莆田人嘉靖十二年進士選庶吉
士歷官南京工部尚書所著有礪峯集

方日乾字子健福清人嘉靖二年進士爲御史

方廉新城人嘉靖二十年進士初投南康推官
爲松江守時倭奴薄城公設奇禦變中外特以
爲安倭平賜金綺進爵尋爲江南巡撫歷陞工

部侍郎卒

管志道字登之太倉州人隆慶六年進士投兵部
主事歷陞僉憲致仕世稱東溟先生

支大綸字華平嘉興人萬曆二年進士

徐顯卿字長洲人隆慶三年進士歷官侍郎

馮從吾字仲好長安人萬曆十七年進士由庶吉
士爲御史建言爲民天啓初歷任工部尚書逆
賢惡之落職崇禎元年復官謚恭定

楊師孔字冷然貴州人萬曆十七年進士初爲山
陽知縣尋督學滇中攝兵事邀曲靖之師夾攻

安氏敗之歷陞浙江左政司叅議卒

侯震暘字起東嘉定人萬曆三十八年進士初授
行人擢給事中天啓四年調外任崇禎改元起
原官卒贈太常寺卿

吳仲

錢梗

皇明經世文編卷之一

方禹脩先生

評定

陳眉公先生

華亭 陳子龍臥子 宋徵璧尚木

選輯

徐孚遠闇公 周立勳勒卣

宋學士文集

頌

宋 濂

平江漢頌

平陳友諒

天命

皇上爲億兆生民主，旌麾所向，悉臣悉庭。初

文法甚簡老

以一旅之師，興濠泗間，遂撫淮南，平江東，攻浙東西

下之。版圖所入方數千里。定都江左。發政施仁。戴白之叟垂髻之童。涵泳至化。皞皞熙熙。如承平時。于時陳友諒據有江漢之地。僭居大號。賊殺其主。飭修蒙衝。虐驅烝黎。如蹈水火。不自度力。又集蜂蟻之衆。直窺豫章。三月不解。皇赫斯怒。乃召群臣于庭而告之曰。陳虜不道。敢屢干侮。昔者蕩搖我邊方。侵軼我姑孰。伺偵我金陵。賴爾一二臣隣之力。攻而敗之。予亦親覆其穴巢。中宵竄走。假息武昌。予不忍追殲之。冀其悔禍。以自逭於天刑。癸卯之夏。乃復圍我豫章。

是其凶德無厭、自取殄滅、此天亡之時、天之明威、予不敢不順、唯爾熊羆之臣、不二心之士、尚弼予以成厥功、群臣曰都、於是右丞臣達、叅知政事臣遇春、帳前親兵指揮使臣國勝、同知樞密院事臣永忠、臣通海、備厥戎器、簡厥師徒以俟。七月癸酉、上躬擐甲胄、禡纛龍江、帥樓船數百、蔽江而上。陳虜大營、解圍而逃。丁亥、與我師遇鄱陽湖之康郎山。戊子、上分舟師爲十二屯。命達遇春永忠突入虜陣、呼聲動天地。矢鋒雨集。砲聲雷鉤。波濤起立。飛火照耀。百里之

內。水色盡赤。焚溺死者動一二萬。流屍如蟻。滿望無際。己丑。焚僞平章舟。刈戮餘二千。辛卯。復酣戰。虜將張定邊素號梟猛。上親禦之。將士皆死戰。歷一二時。遇春等左右夾擊。殺士卒無算。張中矢百餘而退。潛保小山。不敢吐氣。我師亦據湖口。扼彼喉衿。列柵南北江岸。置火筏中流。水陸嚴戒。以候其發。八月。虜食盡。遣舟五百艘掠糧都昌。又爲我大將所獲。壬戌。虜計窮。冒死突出。將上趨九江。上命諸將一時俱合。其大戰如戊子。自辰達酉。督戰益急。友諒中飛矢。

斃于舟中。癸亥降其衆五萬。上命釋之不戮一人。

○補○揚○州○勝○○

凱歌而旋。舳舻相銜。旌旗飛翻。不疾不徐。委蛇而來。

萬姓歡迎。俯伏道左。山川草木皆有喜色。告廟飲至。

行賞論功。賜遇春田若干。永忠田若干。其餘將士賚

金繒有差。臣稽在昔。曹操治水軍八十萬來攻孫權。

以○此○二○事○爲○比○使○實○既○擊○更○見○謙○約

而周瑜黃蓋敗之於赤壁。苻堅發長安戎卒六十餘

萬騎二十七萬以侵晉。而謝玄謝石敗之於淝水。然

赤壁不過一焚而走。淝水亦不過軍亂而奔。初未嘗

大戰也。而史臣且書之。以爲千古美談。矧今湖口之

捷血戰累日。天地爲之晦冥。日月爲之無光。山河爲之震盪。其神功駿烈。炳耀鏗鎗。與天無極。較之二國。未足多讓。而歌咏不作。非甚闕典歟。臣謹備著其事。撰爲詞頌一通。以流鴻績於無窮。以俟太史氏之采錄云。其詞曰。天眷有德。實爲哲皇。肆其神畧。以靖寇攘。義旄東指。罔敢弗恭。風烈虎嘯。雲游龍驤。長淮旣歸。江左攸屬。浙之東西。樹侯置牧。乃建國家。以奠南服。以懷中原。以控西蜀。蠢爾小醜。敢讐大邦。集其兇頑。鋒蝟斧螳。輕涉我疆。以跳以踉。亦旣剪刈。僵骸

覆江。洵齊六軍。直傾其穴。釋而勿誅。俾自懲創。闔胡
不然。復豕而噬。翹其蟲臂。當吾車轍。皇明震怒。歷
告在廷。是決不悛。命將徃征。爾選舟師。爾整甲兵。漕
爾糗糧。各罄爾誠。搖光在中。夷則之月。禡牙江濱。
皇秉巨鉞。以誓以戒。以速其發。紀律精明。颯火奮激。
旟旄揚揚。烽纓將將。矛戈洸洸。鎧冑明明。載怒載厲。
載飛載颺。雄威所吞。已無荆湘。旣與虜逢。大呼衝擊。
藥騰藜駁。星流火戟。虐燄電奔。巨轟雷劈。殺氣冥蒙。
不辨咫尺。矢鋒所貫。什伍聯聯。縱橫交紐。命隕弗顛。

橫桅湊颿。筍束蜩編。流尸塞川。舟行弗前。虜魄旣視。
扶創而逸。聚于湖輿。僅存喘息。我方植柵。江之南北。
火筏在流。掩蔽如翼。越歷四旬。飛走途窮。將冒萬死。
以絕其衝。我師見之。千艘如龍。似兔之走。而鷹之從。
酣戰六時。由辰達酉。僕姑一發。殪此酋首。貫睛及顛。
仆若枯柳。大憝旣除。餘不能醜。遮相告言。我誠不振。
我革我頑。我歸至仁。誰謂培塿。可高嶙峋。再拜稽首。
來降來臣。 皇曰俞哉。汝俘予受。宥汝弗劉。予汝父
母。汝凍予衣。汝饑予哺。昔何昏迷。今始撤茹。奏凱而

旋騎吹鬱搖。形干樂歌節。以錫鏡飲。至于廟。頒賞于朝。帛堆其家。肉登其庖。都人聚觀。舉手加額。或嘆或謠。有聲嘖嘖。干戈相尋。匪一朝夕。自今昇平。可坐而笑。惟俱疑平淮西皇神武。動則克之。群策盡屈。四方式之。惟

皇寬慈。降則釋之。義聲動盪。疇能敵之。惟皇明斷。遇事卽決。洞見千里。不隔一髮。所以四征成此駿烈。小大畢朝。孰敢肆孽。在昔赤壁。泊乎合淝。事以幸集。尚傳策書。况茲之功。俊偉赫熹。揆古無讓。可無咏詩。臣雖微賤。文字是職。對揚皇休。并獻臣臆。三代以

還用仁興國。皇宜遵行，永作民極。

鳳陽府新鑄大鐘頌

鳳陽新鐘

皇帝既正大統，建都江表，德綏威讐，萬邦咸臣。用群臣奏臨濠爲龍飛之地，賜名曰鳳陽。南北民大和會，百族錯居，動十萬數。然而物大而盛，不假器齊一之無以嚴昏旦之禁。乃詔江陰侯吳良監鑄大鐘，以定衆志，以俾治化。侯之受詔，遣使者至富春山中，徵金工何成，諭以天子明命。卽日帥其屬十六人以從。相地鳳陽城東三里，搏泥成範，畫其銑角衡之度。

詞意古與

侈弁爲良。篆帶以方。候其燥剛。始穿一十又三。鍊青

赤銅六萬五千斤。筮以洪武乙卯冬十一月己巳蒞

事。厥明。侯具法服。以牛一羊一豕一。祝告先冶之神。

禮既成。橐籥咸興。鼓動風氣。炎光赫曦。上貫霄漢。鋒

液既澄。氣憤雲洩。循竇而入。肅肅有聲。陽施陰凝。勁

質斯具。越二日辛未。乃發。復取牲血塗其罅隙。以厭

除不祥。鍾高十六尺。有五寸。厚六寸。徑十尺。有五寸

圍。三十四尺。有奇。混融其輪圓。燁燁其容輝。信技殫

於人巧。妙奪於神功者也。於是管構層臺。副以篔簹

聚千夫之力。鉅絙而登之。一杵之撞。隱隱闐闐。雷旋電奔。震撼太虛。遐邇聞者。靡不聳愕。會濂扈從。青

宮幸鳳陽。親觀盛美。侯遂請濂爲之頌。濂聞先王之

論序有本

世。金部有七。黃鍾乃樂之所自出。而景鍾又爲黃鍾

之本。所謂景鍾大鍾也。其受至於九斛而止。律呂由

是而應。陰陽由是而均。夫豈細故也哉。秦漢以來。寔

失故法。小鍾或數尺。大鍾或容千石。皆不本於律度。

今我熙朝。稽古右文。定於中制。宣導天地。孚洽神人。

中和所致。嘉瑞畢協。增拓化原。亦於是乎有賴。非特

嚴昏旦之禁而已。濂待罪國史，以文辭爲職業，義當發揚蹈厲，以鳴國家之盛。侯之有請，不敢固辭，頌曰：維天穆清，鼓之雷霆，適昭天聲，百物以生。維

帝濬哲，法天之烈，大鏞斯揭，元氣噴洩，睠于濠梁，真龍飛翔，乘陰御陽，洗濯八荒，神物攸起，是爲帝里，從者如雨，於焉萃止，物大而豐，往來憧憧，節之以鏞，罔敢弗恭，乃飭鳧氏，乃具爐錘，乃烹乃鬻，化金爲水，赤氣夜明，如日之升，流亟而頤，入竇有聲，彬彬斐斐，功同神鬼，不鉏不鋸，不錘不鑄，輪圓順軌，旣啟其型，敢愛斯牲，塗

纂禮成，熒光如星，千夫齊力，臺構懸植，交扛孔奭，載
考載擊，宅今囷囷，觸兮賁賁，摩乾盪坤，以警昕昏，發
○ ○ ○ 慮靈氣，昭融品彙，物無疵癘，年穀攸遂，博碩而龐，聲
與正通，拓美集祥，熏于家邦，惟 皇建極，福之敷錫，
制器有赫，式和民則，稽樂之原，鍾實爲先，律呂以宣，
功垂不刊，小臣作頌，有美無諷，爰咨于衆，是傳是誦，
表

進 大明律表 大明律

臣聞天生烝民，不能無欲，欲動情勝，詭僞日滋，強暴

縱其侵陵，柔懦無以自立，故聖人者出，因時制治，設刑憲以爲之防。欲使惡者知懼而善者獲寧，傳所謂獄者萬民之命。所以禁暴止邪，養育群生者也。譬諸禾黍，必刈稂莠而後苗始茂；方於白粲，必去沙礫而後食可食。苟梗化敗俗之徒，不有以誅之，雖堯舜不能以爲治。夫自軒轅以來，代有刑官，而五刑之法漸著，其詳弗可復知。遠魏文侯師于李悝，始采諸國刑典，造法經六篇。漢蕭何加以三篇，通號九章。曹魏劉劭又衍漢律爲十八篇，晉賈充又參魏律爲二十篇。

唐長孫無忌等又取漢魏晉三家擇可行者定爲十

二篇。大槩皆以九章爲宗。歷代之律。至於唐亦可謂

○唐○律○之○也○

集厥大成矣。洪惟○皇帝陛下受億兆君師之命。登

大寶位。保乂臣民。孳孳弗怠。其訓迪群臣。諄復數千

言。唯恐其有犯。慈愛仁厚之意。每見于言外。是大舜

惟刑之恤之義也。矜憫愚民。無知陷于罪戾。法司奉

獄。輒惻然弗寧。多所寬宥。是神禹見辜而泣之心也。

○心○累○吏○不○得○不○用

○受○法○之○此○致○治○之○本○

唯貪墨之吏承踵元弊。不異白粲中之沙礫。禾黍中

之稂莠也。乃不得已。假峻法以繩之。是以臨御以

來屢詔大臣更定新律。至五六而弗倦者。凡欲生斯民也。今又特敕刑部尚書劉惟謙重會衆律。以協厥中。而近代比例之繁。姦吏可資爲出入者。咸痛革之。每一篇成。輒繕書上。奏揭於西廡之壁。親御翰墨。爲之裁定。由是仰見陛下仁民愛物之心。與虞夏帝王同一哀矜也。易曰。山上有火。旅。君子以明慎。用刑而不留獄。言獄不可不謹也。書曰。刑期于無刑。言辟以止辟。而民自不敢犯也。陛下聖慮淵深。上稽天理。下揆人情。成此百代之準繩。實有易書之

與旨行見好生之德。洽于民心。凡日月所照。霜露所
墜。有血氣者。莫不上承神化。改過遷善。而悉臻雍熙
之治矣。何其盛哉。臣惟謙以洪武六年冬十一月受

應○前○至○唐○集○成○意○

詔。明年二月書成。篇目一準之於唐。曰名例。曰衛禁。
曰職制。曰戶婚。曰廩庫。曰擅興。曰賊盜。曰鬪訟。曰詐
僞。曰雜律。曰捕亡。曰斷獄。採用已頒舊律二百八十
八條。續律百二十八條。舊令改律三十六條。因事制
律三十一條。掇唐律以補遺一百二十三條。合六百
有六。分爲三十卷。其間或損或益。或仍其舊。務合重

輕之宜云。謹俯伏 闕廷、投進奉表以 聞、臣等誠
惶誠懼稽首頓首謹言、洪武七年 月 日具官臣
等上表、

進元史表 元史

伏以紀一代以爲書、史法相沿於遷固、考前王之成
憲、周家有監於夏殷、蓋因已往之廢興、堪作將來之
法戒、惟元氏之有國、本朔漠以造家、用兵戈以爭強、
并部落者十世、逐水草以爲食、擅雄長於一隅、逮至
成吉思之時、大會斡難河之上、始尊位號、漸定教條、

既近取于乃蠻，復遠攻於回紇，渡黃河以蹴西夏，踰
居庸以瞰中原，繼之而金源爲墟，世祖承之而

宋籙遂訖，立經陳紀，用夏變夷，肆宏遠之規模，成混
一之基業，爰及成仁之主，見稱願治之君，唯祖訓之
式遵，思孫謀之是遺，自茲而降，聿號隆平，豐亨豫大
之言，鼓倡於天曆之世，離析渙奔之禍，馴致於至正
之朝，嬖幸蠱惑于中，權姦蒙蔽于外，漢罔祗因於疏
此自古亂階。豈。爾。元。人。哉。
濶周網，遽至于陵遲，風憲皆爲不捕之猫，將士盡成
反噬之犬，由是群雄角逐，九域瓜分，風波徒沸于重

溟海岳竟歸於真主中謝欽惟 皇帝陛下奉天承
運濟世安民建萬世之丕圖紹百王之 正統 大

明出而燭火息率土生輝迅雷鳴而衆響微鴻音斯

此蓋盛德過此百王處

播載念盛衰之故卽推忠厚之仁僉言實旣亡而名
亦隨亡獨謂國可滅而史不當滅特詔遺逸之士欲

求議論之公文詞勿至於艱深事迹務令於明白苟

善惡瞭然在目庶勸懲有益於人此皆 天語之丁

寧愈見 聖心之廣大於是命翰林學士臣宋濂待

制臣王禕儒士臣汪克寬臣胡翰臣宋禧臣陶凱臣

陳基、臣趙堦、臣曾魯、臣趙訪、臣張文海、臣徐尊生、臣黃箎、臣傅恕、臣王鐸、臣傅著、臣謝徽、臣高啟、分科脩纂，故上自太祖，下迄寧宗，靡不網羅，嚴加搜采。恐玩時而愒日，每繼晷以焚膏，故於五六月之間，成此十三朝之史。况往牒舛訛之已甚，而它書參考之無憑。雖竭忠勤，難逃踈漏。若自正統已後，則其載籍無存。已遣使而旁求，俟續編而濂自愧其才識之有限，弗稱三長，兼以紀述之未周，殊無寸補。臣濂忝司鈞軸，幸覩成書，信傳信而疑傳疑，僅克編摩于歲月，筆則

筆而削則削。敢言褒貶於春秋。仰塵乙夜之觀。期作
千秋之鑑。所撰元史紀三十八卷。志五十二卷。表六
卷。傳六十二卷。目錄二卷。通計一百三十萬六千五
百餘字。謹繕寫成百二十冊。隨表上進以聞。

叙

大明日曆叙

大明日曆

此紀開國之蹟。如昔人所作。則業於居註者。是也。

洪武七年。歲在甲寅。夏五月朔日新修。大明日曆

成粵從。皇上興臨濠。踐天位。以至六年癸丑冬。

十又二月。凡戒飭之諄複。征伐之次第。禮樂之沿革。

刑政之設施羣臣之功過四夷之朝貢莫不具載合
一百卷藏諸金匱副在秘書甲寅以後則歲再修而
續藏焉。嗚呼惟天立辟惟辟奉天其能混合三光五
嶽之氣者蓋可數也。然挺生於南服而致一統華夷
之盛自天開地闢以來惟此事實定古來未有皇。上。為。然。其。功。高。萬。古。

一也元季驛騷奮起於民間以圖自全聖論所載初無黃屋左

註。註。云。兼。

纛之念繼憫生民塗炭始取土地群雄之手而安輯
之較之於古如漢高帝其得國之正二也平生用兵
百戰百勝未嘗摧剝以至繼天出治經綸大經皆由

一心運量。文臣武將。不過仰受成算而已。其獨稟全
智三也。欽畏天地。一動一靜。森若神明在上。及至郊
祀存於心目。有赫其臨。甚至不敢仰視。惠鮮小民。復
恐一夫不獲其所。貪墨吏及豪黠之徒。有加害者。必
威之以刑。其敬天勤民四也。后妃居中。不預一髮
之政。外戚亦循理畏法。無敢恃寵以病民。寺人之徒。
惟給事掃除之役。此皆古昔所深患。今絕無之。其家
法之嚴五也。兵戎國之大權。悉歸之於朝廷。有事
征伐。則詔大帥佩將印領之。暨旋則上章綬歸士。

卒。單身還第。其兵政有統六也。嗚呼。帝力難名。度

越前聖。不可以一二識也。今日曆所書。籌畧之運。功

六帝實卷度越千古

業之著。規摹之宏遠。其本蓋原於此矣。然而史書甚重。古稱直筆不溢美。不隱惡。務合乎天理人心之公。

無其事而曲書之者。固非也。有其事而失書者。尤非也。况英明之主。不世出。而記注之官。遷易不常。無以究夫聖德之高深。臣同暨濂。幸獲日侍。燕閑。

十有餘年。知之深。故察之精。察之精。則其書也。頗謂得其實。而無愧。茲因日曆成書。謹揭其大要於首簡。

使他日修實錄者有所採掇庶幾傳信於千萬世也
其總裁官翰林學士承旨嘉議大夫知制誥兼

修國史兼吏部尚書臣詹同翰林侍講學士中順
大夫知制誥同修國史兼太子贊善大夫臣宋

濂、催纂官翰林侍講學士嘉議大夫知制誥同修

國史臣樂韶鳳、纂修官禮部員外郎臣吳伯宗、翰
林編修臣朱右、臣趙燠、臣朱廉、儒學教授臣徐一夔
臣孫作、布衣臣徐尊生、其讐校謄寫則臣伯宗、臣濂
及鄉貢進士臣黃昶、國子生臣陳孟暘、開局於六年

九月四日。歷二百六十有五日。始訖事云。臣濂謹序。

洪武正韻序

正韻

聖祖兼重此音亦定制革俗之一也

人之生也。則有聲。聲出而七音具焉。所謂七音者。牙舌脣齒喉及舌齒各半是也。智者察知之。分其清濁之倫。定爲角徵宮商羽。以至於半商半徵。而天下之音盡在是矣。然則音者。其韻書之權輿乎。夫單出爲聲。成文爲音。音則自然協和。不假勉強而後成。虞廷之賡歌。康衢之民謠。姑未暇論。至如國風雅頌四詩。以位言之。則上自王公。下逮小夫賤隸。莫不有作。以

人言之其所居有南北東西之殊故所發有剽疾重
遲之異。四方之音萬有不同。孔子刪詩皆堪被之絃
歌者取其音之協也。音之協其自然之謂乎。不特此
也。楚漢以來離騷之辭。郊祀安世之歌。以及於魏晉
諸作。曷嘗拘於一律。亦不過協比其音而已。自梁之
沈約拘以四聲八病。始分爲平上去入。號曰類譜。大
抵多吳音也。及唐以詩賦設科。益嚴聲律之禁。因禮
部之掌貢舉。易名曰禮部韻畧。遂至毫髮弗敢違背。
雖中經二三大儒。且謂承襲之久。不欲變更。縱有患

其不通者。以不出於朝廷。學者亦未能盡信。唯武夷吳棫患之尤深。乃稽易詩書而下逮於近世。凡五十家。以爲補韻。新安朱熹據其說以協三百篇之音。識者雖或信之。而韻之行世者猶自若也。嗚呼音韻之備。莫踰於四詩。詩乃孔子所刪。舍孔子弗之從。而唯區區沈約之是信。不幾於大惑歟。恭惟

皇上稽古右文。萬機之暇。親閱韻書。見其比類失倫。聲音乖舛。召詞臣諭之曰。韻學起於江左。殊失正音。有獨用當併爲通用者。如東冬清青之類。亦有一

韻當析爲二韻者，如虞模麻遮之屬，如斯之類，不可枚舉，卿等當廣詢通音韻者，重刊定之。於是翰林侍講學士臣樂韶鳳、臣宋濂、侍制臣王僎、修撰臣李叔允、編修臣朱右、臣趙壘、臣朱廉、典簿臣瞿莊、臣鄒孟達、典籍臣孫箴、臣荅祿與權、欽遵。明詔研精覃思，

壹以中原雅音爲定。復恐拘于方言，無以達于上下。質正於左御史大夫臣汪廣洋、右御史大夫臣陳寧、御史中丞臣劉基、湖廣行省叅知政事臣陶凱，凡六。謄藁始克成編，其音諧韻協者併之，否則析之。義同。

字同而兩見者合之。舊避宋諱而不收者補之。註釋則一依毛晃父子之舊。勒成一十六卷。計七十六韻。共若干萬言。書奏賜名曰洪武正韻。勅臣濂爲之序。臣濂竊惟司馬光有云。備萬物之體用者莫過於字。包衆字之形聲者莫過於韻。所謂三才之道。性命道德之奧。禮樂刑政之原。皆有繫於此。誠不可不慎也。古者之音唯取諧協。故無不相通。江左制韻之初。但知縱有四聲。而不知衡有七音。故經緯不交。而失立韻之原。往往拘礙不相爲用。宋之有司。雖嘗通併。

僅稍異於類譜。君子患之。當今聖人在上。車同軌

而書同文。凡禮樂文物。咸遵往聖。赫然上繼唐虞之治。至於韻書。亦入宸慮。下詔詞臣。隨音刊正。以洗

千古之陋習。猗歟盛哉。雖然旋音以七音爲均。均言

韻也。有能推十二律以合八十四調。旋轉相交。而大

○更○見○有○開○係○

樂之和。亦在是矣。所可愧者。臣濂等才識闇劣。無以

上承德音。受命震惕。罔知攸措。謹拜手稽首。序

于篇端。予以見聖朝文治大興。而音韻之

於古云。

郊禋慶成詩序

郊禋慶成

聖祖身及一郊祀此亦前五所不能及

皇帝自登大寶主百神。卽有事于昊天上帝。以

仁祖淳皇帝配神作主。于今五載。弗懈益恭。粵洪武

壬子冬十一月辛酉日長至。復邁其時。前期丙辰

上御奉天殿。集臣工于庭。告以誓命。戊午出宿齋宮。

有司汜掃反土。鄉爲田燭。各戒具修。罔敢弗肅。及期

行事。百辟卿士。後先駿奔。牲牲肥腍。圭幣溫綴。器用

質雅。酒齊苾芬。樂舞具舉。升煙上聞。皇心內外。質

文兩盡。上帝居歆。福祿攸降。旣竣事。禮部尚書陶

凱工部尚書黃肅工部侍郎牛諒晉府叅軍熊鼎

磨勘司令吳雲兵部郎中劉崧工部主事周子諒秘

書監丞陶諶晉府錄事張孟兼吳府錄事吳從

善咸謂皇帝升中于天國之大典幸際熙明與於

文獻卷○老

執豆籩之列不可無篇什以紀慶成昭示萬世遂以

唐詩星臨萬戶動月傍九霄多爲韻各賦詩一章而

屬濂序之濂聞郊祀之禮始於有虞氏至周大備秦

漢以來寢涉不經且感於六天六帝之說莫之適從

君國子民者亦罕能躬嚴祀事往往遣大臣攝之肆

惟皇上。壹據禮經。而洗千古之陋。每歲親升泰壇。昭事上帝。恪恭寅畏。有赫其臨。陰歛陽舒。降甘風雨。覃及寰宇。物無疵厲。行見鳳凰降而龜龍假矣。聲歌之發。茲非其時乎。昔者周人之頌。所謂昊天有成命者。郊祀天地也。思文者后稷配天也。二詩辭氣與密卒未易曉。然非卜商之序。揭其宏綱。後世何自而明之。羣公之什。優柔而雅馴。整肅而泰豫。足以美盛德。形容而告於神明。善言詩者。謂其有得周人之微旨。所可愧者。濂非卜商之識。僭序作者之意。君子其謂

斯何雖然一代之成憲後王之所取法者其大槩亦頗著見於間云是歲十有二月甲戌朔金華宋濂謹序

應制冬日詩序

冬日應制

洪武二年冬十一月二十有二日 上御外朝遣中

貴人召翰林學士臣濂侍講學士臣素侍讀學士臣

同直學士臣經待制臣禕起居注臣觀臣琳列坐左

右

既而命大官進饌賜黃封酒飲之。上屢命盡觴

內官承 上旨監勸甚力臣濂數以弗勝盃酌固辭

上笑曰卿但飲雖醉無傷也酒終上親御翰墨

賦詩一章復繫小序于首命各以詩進臣濂最先臣禕次之臣觀臣琳臣經臣同又次之上覽之大悅

臣素最後詩以民瘼爲言上曰素終老成其有軫

念蒼生之意乎於是各霑醉而退明日臣素以遭逢

盛際光膺聖眷如此不可無以示後來乃集其

詩爲卷而以題辭爲屬臣聞之在唐中世當夏日炎

蒸君臣相與賦詩不過以日長爲可愛涼生殿閣爲

足矜後代多譏之惟我皇上勵精圖治其於冬日

沍寒之際形諸篇翰固不忘於聽政羣臣賡歌復以
○文○法○高○格
逸豫爲戒憂勤爲勸而弗敢後者其故何哉蓋唐虞
在上無小無大孰不精白一心以承明德况於文學
法從之臣職在獻替者乎揆之於唐初不可以同日
而語也臣濂不佞庸敢以是序諸篇端上所賦詩
別以金龍箋繕謄其副尊閣於家示不可褻也。

庚戌京畿鄉闈紀錄序

京畿鄉闈

昊天有成命皇明受之謂天下可以馬上得不可
以馬上治於是大興文教寵異四方乃洪武三年夏

五月以科目選士，詔內外之官胥此焉出。閱三月，畿甸之士將集試於京府。禮部以聞，皇帝御謹身殿。

劉誠意為我明正司之首

召前御史中丞臣基，今治書侍御史臣裕伯，俾司去留之任，而以翰林侍讀學士臣同，弘文館學士臣稼，起居注臣韶鳳，尚寶丞臣潛，國史臣濂佐其事。各賜幣帛而勞遣之。既受命，不敢宿於家，即相率詣試所，精白一心以承。休德先期一日，夜漏下十刻，始命題。至次日黎明給之，兵後學廢，不敢求備於人。其來試一百三十有三，在選者過半焉。既撤棘，僉謂遭逢

人心少而萬多如此

盛際文運方開，不可無紀述以示於後。爰以諸執事及貢士之姓名輯成小錄，而俾濂序之。濂惟天下弗靖者幾二十年，干戈相尋，曾無寧日，今得以涵濡文化而囿于詩書禮樂之中者，果誰之賜歟？是知帝德廣被，其大難名，不可以一言而盡也。棧樸之詩有曰：周王壽考，遐不作人。聖天子之造士，可謂至矣。烝民之詩有曰：夙夜匪懈，以事一人。凡爲士者，尚思盡瘁報國，以無負于科目哉！是爲序。